

## MARKUS

**Yohanes Pansarani nongolukoni i**

**Yesus**

**1:1-8**

(Mat. 3:1-12; Luk. 3:1-18; Yoh. 1:19-28)

**1** Tundunan kani'i mangkana'i Lele Pore ni Yesus Kristus, men Anakna Alaata'ala. <sup>2</sup>Tumbena lele iya'a koimo ia tulis i nabii Yesaya na kitapna mbaripi, taena, "Yaku' boo momosuu' sa'angu' mian mongolukoni i koo. Mian iya'a boo montoropoti salaan.' <sup>3</sup>Boo isian sa'angu' mian na padang gurun men mangkakaro'kon ka' mambantilkon, taena, 'Totobo'imo a salan bona Tumpu, ka' loosi a bo salanna."

<sup>4</sup>Koi men ia tulis i Yesaya, ya'amo uga' a tatakana i Yohanes Pansarani. Ia dumodongo na padang gurun, ka' nomosuu' mian, taena, "Pombolii na wawaumuu men sala' ka' basarani kada' daa ampunionna Alaata'ala a wawaumuu men sala'." <sup>5</sup>Biai' a mian na lipu' Yudea tia wiwi'na mian na kota' Yerusalem notaka na ko'ona. Raaya'a nangaku wawauna men sala', ka' ia sarani i Yohanes na weerkauna men ngaa-nion Yordan.

<sup>6</sup>Pakean ni Yohanes Pansarani tongko' wuluna unta niwawau, ka' baanna, anit. Kakaanna katumbang tia gurana wani'.

<sup>7</sup>Koi kani'imari a men ia bantilkon i Yohanes mian, taena, "Moko daa i yaku' boo taka i ia men dauga' labi i yaku' a kuasana. Dumudungku' mangalakai lu'na

sapatonapo,<sup>#</sup> sianta momoko i yaku'. <sup>8</sup>Ai yaku' mansarani i kuu tia weer, kasee ai ia boo mansarani i kuu tia Alus Molinas."

1:2: Mal. 3:1 1:3: Yes. 40:3 1:6: 2Raj. 1:8

**Yesus ia sarani i Yohanes**

**Pansarani**

**1:9-11**

(Mat. 3:13-17; Luk. 3:21-22)

<sup>9</sup>Tempona iya'a, i Yesus nde'emari Nasaret na lipu' Galilea, notaka ni Yohanes. Ai Yesus ia sarani i Yohanes na weerkauna Yordan. <sup>10</sup>Sarataa no'umuar na weer i Yesus, ia' nimiile' langit nokobongkatian, ka' Alus Molinas koi marampatii nalawu na wakana. <sup>11</sup>Kasi nokamporongoran a wurungna Alaata'ala ndara'amari na surugaa, taena, "Koomo a Anak men kologu'ku ka' men daa kokana' na noangku."

1:11: Kej. 22:2, Mzm. 2:7, Yes. 42:1, Mat. 3:17, 12:18, Mrk. 9:7, Luk. 3:22

**Yesus ia sobai Ibiliis na padang**

**gurun**

**1:12-13**

(Mat. 4:1-11; Luk. 4:1-13)

<sup>12</sup>Noko daa iya'a, Alus Molinas nangawawamo i Yesus na padang gurun. <sup>13</sup>Ai Yesus dongo-dongo patompulo' ilio na padang gurun ka' ia sobai Ibiliis. Ia na tanga-tanga'na ayop malela', kasee malaa'ikatna Alaata'ala mansambai i ia.

---

1:7 sapatonapo: dudusna sapato men maripi koi sandaal'kasee isian lu'na.

**Yesus notaka na Galilea ka'  
nengelele'kon Lele Pore**

**1:14-20**

(Mat. 4:12-22; Luk. 4:14-15, 5:1-11)

<sup>14</sup>Noko daa i Yohanes nirakop ka' nitarungku, taka i Yesus na Galilea ka' mengelelekon Lele Pore men na Alaata'ala, <sup>15</sup>taena, "Temponamo. Batomundo'anna Alaata'ala karani'mo. Boliimo a wawau-muu men sala' ka' parasayamo na Lele Pore!"

<sup>16</sup>Tempona i Yesus nomae' noso'ole na danau Galilea, ia nimiile' i Simon tii Andreas moto'utus. Raaya'a pintanga' muntuong puka' na danau, gause limangna i raaya'a mumuka' susum. <sup>17</sup>Ai Yesus norobu na ko'ona i raaya'a, taena, "Mai i kuu, lolo' i yaku', kada' boo poposidaonku pumuka' mian." <sup>18</sup>Liuliu ia parerei i raaya'a puka'na ka' nongololo' i Yesus.

<sup>19</sup>Ndeendee'e ia nimiile'mo anak ni Zebedeus, ai Yakobus tii Yohanes moto'utus, kaekae' montotobo'i puka'na na lalomna duangan. <sup>20</sup>Ka' ia leelo' i Yesus i raaya'a. Raaya'a uga' liuliu namarerei tamana tia mian men ia tamboi i raaya'a balimang na duangan, kasi nomae' nongololo' i Yesus.

1:15: Mat. 3:2

**Yesus numbuse'i meena men  
mangalampingi mian**

**1:21-28**

(Luk. 4:31-37)

<sup>21</sup>Noko daa koiya'a, ari Yesus notakamo na kota Kapernaum. Na ilio Sabat, ai Yesus ninsoop na laigan ba'ibadatan ka' nimisiso' mian. <sup>22</sup>Mian i raaya'a men nongo-

rongor pisiso' ni Yesus nosamba', gause ai ia mimisiso' mian koi se' inti'ionna tuu' a upa men siso'-kononna, ka' pimisiso'na poosasala' tia na wawa ukum Torat.

<sup>23</sup>Tempona iya'a, na lalomna laigan ba'ibadatan, isian sa'angu' mian men ia lampingi meena. Mian iya'a nangkakaro', taena, <sup>24</sup>"Oo Yesus samba Nasaret, aupa a urusanmuu tii kai? Ai koo taka bo minsilaka'i i kai? Inti'ionku se' i ime i koo: Koo men Molinas ndara'amari na Alaata'ala." <sup>25</sup>Kasee ai Yesus nomotongkodi' meena iya'a, taena, "Rokot, ka' uar na wakana mian kanono!" <sup>26</sup>Meena iya'a ningirimpa-rimpa'konmo mian men ia lampingi, ka' nangkakaro', kasi no'umuar. <sup>27</sup>Wiwi'na mian men nimiile' nosamba', tamban i raaya'a nopootundunii, taena, "Se', aupa inta ini'i? Sa'angu' pisiso' u'uru, ka' ia batundun koi se' inti'ionna tuu' a upa men siso'kononna. Meenapo parentaonna, ka' raaya'a momorongori i ia." <sup>28</sup>Liuliu notolele a wawau ni Yesus longko-longkop tano' na Galilea.

1:22: Mat. 7:28-29

**Yesus nengelesi'i monian ni Simon  
tia mian biai'**

**1:29-34**

(Mat. 8:14-17; Luk. 4:38-41)

<sup>29</sup>Tonguar na laigan ba'ibadatan iya'a, ari Yesus nomae'mo na laigan ni Simon tii Andreas. Ai Yakobus tii Yohanes nomae' uga'. <sup>30</sup>Monian ni Simon men wiwine toko-tokol mabarang, mapanas a wakana. Mian na laigan iya'a liuliu nambantikon i Yesus. <sup>31</sup>Ia nomae'mo

na tokolanna wiwine iya'a, ningintoni limana ka' nanga-wangonkon. Wiwine iya'a liuliu nalesi'. Noko daa, wiwine iya'a nangalabotimo i raaya'a.

<sup>32</sup>Guntumalom,<sup>#</sup> niwawamo ni Yesus a wiwi'na mian men mabarang tia mian men ia lampingi meena. <sup>33</sup>Wiwi'na mian na kota iya'a nobarimpung na aropna laigan men isian i Yesus. <sup>34</sup>Ia nengelesi'imo mian biai', men biai' kaliangan a nggeona. Ka' ia uga' numbuse'i meena biai'. Ai Yesus sian namatai meena i raaya'a bisara,<sup>#</sup> gause raaya'a ninginti'imo i ia.

**Yesus nimisiso' mian longko-longkop Galilea**

**1:35-39**

(Luk. 4:42-44)

<sup>35</sup>Ma'ulo-ulop tuu', ilio dauga' pintung, Yesus nowangonmo ka' nomae' na liwana kota. Ia nomae' na tempat men oloa a mian ka' nobarado'a inda'aa. <sup>36</sup>Kasee ai Simon tia samba-sambana nansarak i ia. <sup>37</sup>Ia rumpakimo i raaya'a, raaya'a nuntundun, taena, "Wiwi'na mian mansarak i kuu." <sup>38</sup>Kasee taena i Yesus, "Mai, kita rae' na tempat sanggiran, na kota men beebeel kaniaale'e, kada' inda'aa uga' ai yaku' montolelekon Lele Pore, gause i yaku' notaka bo montolelekon Lele Pore." <sup>39</sup>Kasi nomae'

i raaya'a longko-longkop Galilea. Ia nontolelekon Lele Pore na laigan ba'ibadatan, ka' mumbuse'i meena men nangalampingi mian.

1:39: Mat. 4:23, 9:35

**Yesus nengelesi'i sa'angu' mian men kustaon**

**1:40-45**

(Mat. 8:1-4; Luk. 5:12-16)

<sup>40</sup>Tempo iya'a, isian sa'angu' mian kustaon<sup>#</sup> notaka ni Yesus, ka' notumutumba' na aropna. Ia nama'ase' paratulungan ni Yesus, taena, "Kalu ai kuu mo'uus, ai kuu mamaka'ala mengelesi'i i yaku'."

<sup>41</sup>Tongkibit a noa ni Yesus nolinggu'. Ia soorkon a limana nongkoyong mian iya'a, ka' nobatundun, taena, "Daa, yaku' mo'uus; palesi'mo i koo."

<sup>42</sup>Tempo iya'a uga', pa'anu a kustana mian iya'a. Ia liuliu nalesi'. <sup>43</sup>Liuliu i Yesus nomosuu' mian iya'a nomae' na Imamna Yahudi, tia nompopo'-inau', taena, <sup>44</sup>"Imama-toon pore-pore; alia i koo mambantilikon upa-upa men yaku' wawau kani'i na mian sanggiran, kasee rae' pipiile'kon a wakaam na Imam, ka' soorkon a upa

pantarai men nalesi'aan, koi men ia parentakon i Musa na ukum Torat, kada' manasa na mian se' i koo daa nalesi'mo."

<sup>45</sup>Kasee mian iya'a nomae' nuntundun upa men nosida na wakana ka' nontolelekon na mian

**1:32 guntumalom:** Aturanna agama Yahudi, tiodaa sopok a ilio na Ilio Sabat, kasi i raaya'a sida balimang soosoodo.

**1:34 slan namatal meena i raaya'a bisara:** Paraluu ni Yesus nongkokundakon meena iya'a dako' i raaya'a mangaani i ia ka' noa na mian biai' sida kosinga (piile' uga' 3:12).

**1:40 mian kustaon:** Koi aturanna agama Yahudi, panakit kusta minsidakon mianna sian sida muntunde' Alaata'ala na laigan ba'ibadatan.

biai'. Noko daa koiya'a, ai Yesus sianmo ningkakatada minsoop na kota. Ia somo na liwana kota, na tempat men sianta mianna; mau koiya'a, mian na sanda-sanda' lembo' dauga' sataka-taka na ko'ona. 1:44: Im. 14:1-32

**Yesus nipoposala' gause i ia  
nangampuni kasala'anna mian  
2:1-12**

(Mat. 9:1-8; Luk. 5:17-26)

**2** Porusmo bangar pii ilio, ai Yesus notaka na Kapernaum soosodo. Tolele a tundunan, se' na laigan isian i ia. <sup>2</sup>Mbaka' notakamo a mian biai' moruuruut, tamban na laigan sianmo pinsisipan, mau na soopanpo, nobootmo. Pintanga' i ia muntundunkon wurungna Alaata'ala na ko'ona i raaya'a, <sup>3</sup>isian mian toropii ira notaka ni Yesus nangawawa sa'angu' mian repo'; mian repo' iya'a ni'uer paat mian. <sup>4</sup>Kasee i raaya'a sian nomoko nangawawa ni Yesus gause mian indo'o biai' tuu'. Raaya'a somo nantataki atop malempat intu'intu i Yesus. Noko daa nitataki, ia ululmo i raaya'a a mian repo' iya'a tia ueranna. <sup>5</sup>Ia piile' i Yesus se' i raaya'a mamarasaya i ia, mbaka' ia nobatundunmo na mian repo' iya'a, taena, "Oo anakku, kasala'an daa yaku' ampunimo!"

<sup>6</sup>Kasee indo'o isian uga' wawa ukum Torat toropii ira potu'oruang. Taena noana i raaya'a, <sup>7</sup>"Kadai a mian kaya'a se' bisara koiya'a? Wawauna koi se' i ia a Alaata'ala. Tongko' Alaata'ala suungna a men sida mangampuni' kasala'an."

<sup>8</sup>Liuliu ia inti'i i Yesus a

pikiranna wawa ukum Torat. Yesus nobisara na ko'ona i raaya'a, taena, "Kadai se' koiya'a na noamuu? <sup>9</sup>Aupa a men gampangna, mangaan na mian repo' kani'i, 'Kasala'an daa yaku' ampunimo,' kabai mangaan, 'Wangonmo, leengket a ueraan ka' tumpang?' <sup>10</sup>Kasee koini'i pipiile'-kononku na ko'omuu se' ai yaku', Anak Manusia, sida mangampuni kasala'anna mian na dunia." Kasi i Yesus norobu na mian repo' iya'a, taena, <sup>11</sup>"Porongori a wurungku: wangon, ala a ueraan ka' ule'konmo na laigaan!" <sup>12</sup>Mian iya'a nowa-ngonmo, liuliu nangala ueranna na aropna mian biai' ka' no'umuar. Mbaka' i raaya'a wiwi'na nosamba', kasi ninsindua Alaata'ala. Ka' taena i raaya'a, "Upa men pore koi kani'i baasi kita piile'!"

**Yesus nipoposala' gause i ia  
nokumaan tia mian ba'idek a  
gau'na  
2:13-17**

(Mat. 9:9-13; Luk. 5:27-32)

<sup>13</sup>Noko daa iya'a, ai Yesus nomae'mo soosodo na soripi'na danau. Biai' a mian notaka na ko'ona, ka' ia pisiso' i Yesus i raaya'a. <sup>14</sup>Rae-rae' i Yesus indo'o, ia nimiile' sa'angu' mian, ai Lewi a ngaanna, men anak ni Alfeus; ia oru-oruang na laigan pobayaran padak. Yesus nangange i Lewi, taena, "Mai, kada' bo muritku." Mbaka' nokume-kerermo i Lewi, kasi nongololo' i ia.

<sup>15</sup>Noko daa iya'a, ai Yesus tia muritna nokumaanmo na laigan ni Lewi. Biai' a papa'ase' padak tia mian ba'idek a gau'na kumaan

singka-singkat tari Yesus, gause biai' a mian men koiya'a mongololo' i Yesus. <sup>16</sup>Tempo wawa ukum Torat men mian Parisi nimiile' se' ai Yesus kumaan tia papa'ase' padak ka' mian men ba'idek a gau'na i raaya'a, raaya'a nobatundunmo na murit ni Yesus, taena, "Kadai i ia se' kumaan singka-singkat tia papa'ase' padak ka' mian men ba'idek a gau'na?"

<sup>17</sup>Ia toorongor i Yesus i raaya'a, kasi nobapopiala, taena, "Taasi mian men malesi' a paraluu sando, kasee mian men manggeo; yaku' taka taasi' boo mengeleelo' mian maloos, kasee boo mengeleelo' mian ba'idek a gau'na kada' mongololo' i yaku'."

**Pisiso' ni Yesus sian pookakana' tia pisiso'na mian men olukon**  
2:18-22

(Mat. 9:14-17; Luk. 5:33-39)

<sup>18</sup>Isian sa'angu' tempo murit ni Yohanes toropii ira ka' mian Parisi toropii ira pintanga' apata, notaka a mian pii ira ka' nobatundun ni Yesus, taena, "Kadai a murit ni Yohanes tia muritna mian Parisi ba'apata, kasee muritmuu sian?"

<sup>19</sup>Ia simbat i Yesus tia popiala, taena, "Sida a sawe' na moro'one ba'apata na posuo'anna see suo' moro'one iya'a dauga' indo'o tii raaya'a? Kalu suo' moro'one dauga' indo'o tii raaya'a, sabole sianta ba'apata i raaya'a. <sup>20</sup>Kasee boo taka tempona suo' moro'one iya'a rensakonon na ko'ona i raaya'a, nono'si ka' ba'apata i raaya'a.

<sup>21</sup>Sian sa'angu'ipo mian mantampalkon sangkeap toik u'uru na

bokukum men manau', gause kalu koiya'a, toik pantampal iya'a men u'uru kumomput ka memberak bokukum manau', mbaka' kaekae' balaki' a berakna. <sup>22</sup>Koiya'a uga', sian sa'angu'ipo mian mingisiikon anggur men u'uru na lalomna isiikonan anggur men manau' men moninitmo. Kalu moninitmo, anggur iya'a memberak isiikonanna anggur iya'a, mbaka' anggur tia isiikonanna, rua-rua'na kolalaisian. Kasee anggur men u'uru tiodaa isiikonon na isiikonan men u'uru uga'."

**Yesus ia poposala' mian Parisi gause wawauna na ilio Sabat**  
2:23 - 3:6

(Mat. 12:1-14; Luk. 6:1-11)

<sup>23</sup>Na sa'angu' ilio Sabat, ari Yesus nosumalan na ale'na gandum. Pintanga' potora'e' i raaya'a, muritna numpupu koengna gandum. <sup>24</sup>Mbaka' mian Parisi nuntundun ni Yesus, taena, "Piile! Kadai i raaya'a se' mangawawau upa men sian pata-laion na ilio Sabat?"

<sup>25</sup>Ia simbat i Yesus na ko'ona i raaya'a, taena, "Sianpo kuu basa a upa men ia wawau i Daud tia lolo'na tempona i raaya'a nololu? <sup>26</sup>Ia ninsoop na laiganna Alaata'ala ka' nitarai nangkaan roti men nirookonmo bona Alaata'ala. Tempona iya'a i Abyatar a imam balaki'. Kalu mongololo' na Torat, tongko' imam-imam a men sida nangkaan roti iya'a. Kasee i Daud nangkaan tamban nantarai giigi' lolo'na."

<sup>27</sup>Kasi i Yesus nobisara na ko'ona i raaya'a, taena, "Ilio Sabat niwawau kada' bo puntulung mian, ka' taasi'po mian niwawau kada' bo

repaion na ilio Sabat. <sup>28</sup>Yaku' uga', Anak Manusia, a Pinginti'i na ilio Sabat."

**3** Noko daa koiya'a, ai Yesus ninsoopmo soosodo na laigan ba'ibadatan. Isian indo'o sa'angu' mian men pate a limana sambotak. <sup>2</sup>Isian uga' mian toropii ira manganasai i Yesus, too-too i ia mengelesi'i mian iya'a na ilio Sabat, kada' pomposala'anna i raaya'a i Yesus. <sup>3</sup>Ai Yesus nobisara na mian men pate a limana sambotak iya'a, taena, "Mai, kekerer na tanga!" <sup>4</sup>Noko daa, ai Yesus nobisaramo na mian i raaya'a, taena, "Aupa a men patalaion na ilio Sabat, mangawawau pore kabai mangawawau ba'idek, momotuo'i mian kabai mampapatei mian?" Kasee i raaya'a tongko' potorokot.

<sup>5</sup>Ia nasiongo'konmo kotabingalanna i raaya'a, ka' ia nomaso'. Ia nantangak tiku-tikum na ko'ona i raaya'a, kasi nobisara na mian iya'a, taena, "Soorkon a limaam!" Uga' ia soorkonmo, mbaka' na'anumo a limana iya'a. <sup>6</sup>Kasi no'umuar na laigan ba'ibadatan a mian Parisi toropii ira ka' nobasangada tia winawa ni Herodes toropii ira boo mampapatei i Yesus.

2:23: Ul. 23:25 2:26: Im. 24:29  
2:25-26: 1Sam. 21:1-6

Yesus ia lolo' mian biai'  
3:7-12

<sup>7</sup>Noko daa koiya'a, ai Yesus tia muritna nomae'mo nobalimba' na danau. Biai' a mian na lipu' Galilea nongololo' i ia. Isian uga' men

nda'amari lipu' Yudea, <sup>8</sup>nda'amari kota Yerusalem, nda'amari lipu' Idumea, nde'emari sambotakna weerkauna Yordan, ka' nda'amari tano' Tirus tia Sidon. Biai' a mian notaka na ko'ona, gause i raaya'a nongorongor wiwi'na upa men ia wawau i Yesus.

<sup>9</sup>Mian biai' tuu'. Ai Yesus somo nomosuu' muritna montoropoti duangan sa'angu' bo ko'ona, dako' laat ko'ipit na mian i ia. <sup>10</sup>Wiwi'na mian men ia kana' nggeo, popeepeet mae' na ko'ona boo monsingkom# i Yesus, gause i ia mengelesi'i mian biai'.

<sup>11</sup>Mian men ia lampingi meena, sinampang mimiile' i Yesus, tonsungol na aropna, ka mangkakaro', taena, "Koomo inono' mba'a a men Anakna Alaata'ala." <sup>12</sup>Kasee i Yesus nongkokundakon tuu' meena i raaya'a dako' mambantikon se' ai ime i ia.

3:9-10: Mrk. 4:1, Luk. 5:1-3

Yesus nengeleelo' sompulo' rua'  
muritna  
3:13-19

(Mat. 10:1-4; Luk. 6:12-16)

<sup>13</sup>Noko daa iya'a, nolumoponmo i Yesus mbaara'a buu'na. Ia nengeleelo' toropii mian men koki-ra'na ka' mian i raaya'a uga' notakamo na ko'ona. <sup>14</sup>Ia nungururuki sompulo' rua' mian boo mongololo' i ia, ka' boo posuu'onna kada' mambantikon Lele Pore, <sup>15</sup>ka' ia tarai kuasa boo pumbuse'i meena. <sup>16</sup>Sompulo' rua' mian men ia patuk iya'a, ya'amo, ai Simon, men ia ngaani i Yesus, ai

Petrus, <sup>17</sup>ka' i Yakobus tia utusna ai Yohanes, rua-rua' irana iya'a anak ni Zebedeus, ka' rua-rua'na ia ngaani i Yesus Boanerges, men aratina, anakna kokurung. <sup>18</sup>Men sanggiran, ai Andreas, Pilipus, Bartolomeus, Matius, Tomas, Yakobus, anak ni Alpeus, Tadeus, Simon men Zelot, <sup>19</sup>ka' ai Yudas Iskariot, men komburi'na nongorookon i Yesus na musuna.

**Yesus mungurungku'i Ibiliis  
3:20-30**

(Mat. 12:22-32; Luk. 11:14-23, 12:10)

<sup>20</sup>Noko daa iya'a, ari Yesus ninsoopmo na laigan sangkau. Ka' notaka a mian biai' ningiriwuti i raaya'a tamban nokumaanpo, sianmo ia sida i raaya'a. <sup>21</sup>Ia rongor poto'utusanna a wawauna i Yesus se' koiya'a, taka i raaya'a bo mondolo' i Yesus, gause taena i raaya'a, i Yesus sianmo matotong.

<sup>22</sup>Ka' wawa ukum Torat men notaka nda'amari Yerusalem nobatundun, taena, "Ai Yesus ia lamingimo Beelzebul, men tomundo'na meena." Taena uga', "Ai Yesus mumbuse'i meena men mangalampingi mian tia ukumaatna tomundo'na meena."

<sup>23</sup>Ai Yesus nengeleelo' wawa ukum Torat iya'a, kasi nobatundun na ko'ona i raaya'a see tia popiala, taena, "Koi'upa a Ibiliis ka' mumbuse'i Ibiliis?" <sup>24</sup>Kalu sa'angu' batomundo'an sian mosa'angu', batomundo'an iya'a sian bakitaan, <sup>25</sup>ka' kalu sa'angu' suo' pookakaresa, suo' iya'a sian bakitaan. <sup>26</sup>Koiya'a uga', kalu Ibiliis poopapate simbaya'na, ka' ko'obo-obos a

batomundo'anna, batomundo'anna sianmo bakitaan, mbaka' takamo a kosilaka'anna.

<sup>27</sup>Kasee tuutuu'na, sian sa'angu' ipo mian men momoko miminsoopi laiganna mian men bukuan ka' mangarampasi kupangna, kalu sian punguonna kutung a mian bukuan iya'a. Tiodaa koiya'a, kasi daa sida rampasion a kupangna.

<sup>28</sup>Imamat a wurungku kani'imari: Tuutuu'na, wiwi'na kasala'anna mian sida ampunionna Alaata'ala, mau wurung men mingideki. <sup>29</sup>Kasee kalu sa'angu' mian mingideki Alus Molinas, ia sian sida ampunion pataka manau', gause mian iya'a nangawawaumo sala' men sidutu."

<sup>30</sup>Koiya'a nambantili ni Yesus wawa ukum Torat iya'a, gause i raaya'a nangaani i Yesus ia lamingi meena.

3:22: Mat. 9:34, 10:25 3:29: Luk. 12:10

**Yesus ia leelo' poto'utusna  
3:31-35**

(Mat. 12:46-50; Luk. 8:19-21)

<sup>31</sup>Mbaka' notakamo a sinana tia utus ni Yesus. Poto-potokerer i raaya'a na liwana, raaya'a nomosuu'mo mian mengeleelo' i Yesus. <sup>32</sup>Isian mian biai' no'umoruang nintikumi i Yesus. Mian i raaya'a nobatundun na ko'ona i Yesus, taena, "Piile', sinaam ti utuus moraale'e na liwana, mamparipari ka' momootuungi i kuu."

<sup>33</sup>Taena i Yesus na ko'ona i raaya'a, "Ime a sinangku ka' ime a utusku?" <sup>34</sup>Ia nimiile' gigi' mian men no'umoruang tiku-tikum i ia kasi nobisara taena, "Raani'imo a

sinangku tia utusku! <sup>35</sup>Ime-ime a mangawawau po'uusna Alaata'ala, ia a utusku tia sinangku."

**Popiala na sa'angu' po'ale'**  
**4:1-12**

(Mat. 13:1-17; Luk. 8:4-10)

**4** Na sa'angu' tempo, ai Yesus nimisiso' mian soosodo na soripi'na danau. Mbaka' notakamo a mian biai' tuu' ningiriwuti i ia, mbali' i ia somo nolumakit na sa'angu' duangan men labu-labu, ka' no'umoruang indo'o. Mian biai' iya'a, wiwi'na na tano' na soripi'na danau. <sup>2</sup>Ka' ai ia nimisiso'kon biai' kaliangan tia popiala na ko'ona i raaya'a.

Koi kani'i a pisiso'na, taena, <sup>3</sup>"Porongori ini'imari! Isian sa'angu' po'ale' mae' kumambur na ale'. <sup>4</sup>Na tempo i ia nangkambur, wine' sanggiran notongkela na soripi'na salan, kasi notaka a sapu' nangkaan pataka nokabus. <sup>5</sup>Sanggiran notongkela na tano' men karabatu, men sian biai' a tano'na, mbaka' liuliu notumuo' gause tano'na monipis. <sup>6</sup>Kasee tongko' manungkabe' a ilio, nalaumo a roonana, kinokangku-kangkungna, gause sian paraa niwakat. <sup>7</sup>Sanggiran notongkela na tanga-tanga'na rakut ruri'on, ka' no'uminsur a rakut ruri'on iya'a ka' ningipit aso-asok iya'a, mbaka' ia sianmo niwoo'. <sup>8</sup>Ka' sanggiran notongkela na tano' men pore. Ia notumuo' molumba' ka' niwoo'. Woo'na isian men ninturang poro tolumpulo' paku' poro nomompulo' paku', ka' isian uga' men para sa'atu paku'."

<sup>9</sup>Noko daa iya'a, ia tundun

i Yesus, taena, "Kalu i kuu mo'uus minginti'i Batomundo'an Alaata'ala, imamat pore-pore!"

<sup>10</sup>Daa somo suungna i ia, toropii mian men nongololo' i ia tia sompulo' rua' muritna iya'a, nimiki-rawar na ko'ona aratina popiala iya'a. <sup>11</sup>Tae ni Yesus, "Maripi mian sianpo ninginti'i Batumundo'anna Alaata'ala. Koini'i nipokobantilkonmo na ko'omuu, kasee na mian sanggiran men sian mongololo' pisiso'ku, wiwi'na upa nibantilkon tia popiala. Batomundo'anna Alaata'ala nipopialakon, <sup>12</sup>kada' daa sida a men nitulis, 'Mau mimiile', i raaya'a sian mingimamat; maupo mongorongor, i raaya'a sian mangaratii, dako' i raaya'a mombolii wawauna ka' mantausi ka'ampunan."

4:1: Luk. 5:1-3 4:12: Yes. 6:9-10

**Toropii kaliangan pangalabot**  
**wurungna Alaata'ala**  
**4:13-20**

(Mat. 13:18-23; Luk. 8:11-15)

<sup>13</sup>Kasi ia pikirawar na ko'ona i raaya'a, taena, "Ai kuu se daa nangaratimo popiala kani'i kabai sianpo? Kalu sianpo, koiupa a pangaratimuu popiala sanggiran?"

<sup>14</sup>Po'ale' men nangkamburkon wine' nompopialakon mian men mengelelekon wurungna Alaata'ala. <sup>15</sup>Tano' na soripi'na salan nompopialakon mian men nongorongor wurungna Alaata'ala iya'a, kasee liuliu notaka a Ibiliis ninsiasa wurungna Alaata'ala men baasi nilelekon na ko'ona i raaya'a.

<sup>16</sup>Tano' men watuon nompopialakon mian sanggiran men nongorongor wurungna Alaata'ala, ka'



liuliu nangalabot tia noa beles; <sup>17</sup>kasee raaya'a kosian niwakat, mbali' tongko' notontaan sangkodi' a wurungna Alaata'ala. Komburi'na, kalu susaionna mian tia sakisaaon i raaya'a gause i raaya'a nangalabot wurungna Alaata'ala iya'a, raaya'a liuliu minsasapu.

<sup>18</sup>Tano' men isian rakut ruri'on nompopalakon mian sanggiran men nongorongor wurungna Alaata'ala, <sup>19</sup>kasee raaya'a tongko' minginau' men bo tutuo'na na dunia ka' mingkira' bi kupangon biai'. Rupa-rupa a ko'usna noana, mbali' i raaya'a sian mingimamat wurungna Alaata'ala iya'a. Raaya'a koi aso-asok men sian niwoo'.

<sup>20</sup>Kapupusanna, tano' men pore nompopalakon mian men mongorongor ka' mangalabot wurungna Alaata'ala, kasi mongololo' po'uusna Alaata'ala. Raaya'a koi aso-asok men ninturang titiu', koi poro tolumpulo' paku', kabai men ninturang biai', koi poro nomompulo' paku', kabai se' men ninturang biai' tuu, koi para sa'atu paku'."

**Batomundo'anna Alaata'ala boo  
ka'inti'ian  
4:21-25  
(Luk. 8:16-18)**

<sup>21</sup>Ai Yesus nobisara soosodo na ko'ona i raaya'a, taena, "Mian moboloak taasi' boc sa'uon tia gumbang, kabai pokelaon na intuna tokolan, kasee kada' daa pokelaon na wawona sulaan.

<sup>22</sup>Koia'a uga', a upa men ninaa', komburi'na uga' boo bantilkonon. Ka' upa men mawuni, komburi'na daa kampiile'an. <sup>23</sup>Kalu i kuu mo'uus minginti'i Batumundo'anna Alaata'ala, imamat pore-pore!"

<sup>24</sup>Ai Yesus ningimputi tundunnanna, taena, "Imamat a upa men kuu rongor! Takalan men kuu pake boo mantakal, bo takalkonon na ko'omuu. Kuu mangalalabii kabai se' mangalalapi, koia'a uga', mau labi a na ko'omuu. <sup>25</sup>Gause mian men isianmo upa ia tombonoi bo taraion soosodo, kasee mian men sianta upa ia tombonoi, mau tongko' titiu', bo alaon# na ko'ona."

4:21: Mat. 5:15, Luk. 11:33 4:22:  
Mat. 10:26, Luk. 12:2 4:24: Mat. 7:2, Luk.  
6:38 4:25: Mat. 13:12, 25:29, Luk. 19:26

### **Uminurna Batomundo'anna Alaata'ala sian inti'ion 4:26-29**

<sup>26</sup>Kasi tae ni Yesus, "Koi kani'i a Batomundo'anna Alaata'ala iya'a, koi mian men mangkamburkon wine' na tano'. <sup>27</sup>Sianta inti'ionna mian iya'a koi'upa a uminurna wine' iya'a. Malom, tempo ia motokol, kabai ilio, tempo ia wangon, wine' iya'a sumukutmo ka' kaekae' alayo'. <sup>28</sup>Tano' suungna munguarkon woo'na, tumbe-tumbe boinganna, kasi koengna, moko daa, kasi wurasna men bentes. <sup>29</sup>Tempona woo'na mataakmo, ia padakmo mian iya'a, gause kopamadankanmo."  
4:29: Yl. 3:13

4:25 bo taralon...bo alaon: Koia'a uga' mian men isian pinginti'ian na pisiso' ni Yesus, na ko'ona boo turangion, kasee mian men kosian pinginti'ianna, upapo uga' a daa isian na ko'ona, lalapion.

**Sianta saruion a pimbalki'na  
Batomundo'anna Alaata'ala  
4:30-34**

(Mat. 13:31-32, 34; Luk. 13:18-19)

<sup>30</sup>Ai Yesus nobisara soosodo, taena, "Tia aupa pomookokoikonta Batomundo'anna Alaata'ala iya'a, kabai koiupa pompopopialakon tia pimpiile'konta?" <sup>31</sup>Batomundo'an iya'a koi wurasna sasawi<sup>#</sup> nikamburkon na tano'. Wurasna sasawi a men morio' tuu', sianta wurasna gala sanggiran a men mangalalabii. <sup>32</sup>Kasee tempo i ia nikamburkon, ia tumuo' ka' uminsur labi gala sanggiran, kasi mimpanga' biai' ka' moola', mau sapu'po sida mimpeeta ka' lilungionna."

<sup>33</sup>Tia biai' a popiala men koikoimo iya'a, a nambantikon ni Yesus wurungna Alaata'ala na mian biai', pootutu' tia pinginti'ianna i raaya'a. <sup>34</sup>Sinampang i ia mimisiso' mian, isian tia popiala, kasee na muritna bantikononna a aratina wiwi'na, kalu tongko' raaraaya'ana.

**Yesus nokokundakon boyus kada'  
rokok  
4:35-41**

(Mat. 8:23-27; Luk. 8:22-25)

<sup>35</sup>Maamaalom na ilio iya'a, ai Yesus nobatundun na muritna, taena, "Maimo kita waatu'u na sambotakna danau."

<sup>36</sup>Raaya'a namarereimo mian biai' ka' murit ni Yesus nolumakitmo na duangan ka' nangawawa i Yesus men noko

indo'omo na lalomna. Raaya'a nomae'mo ka' isian uga' duangan men sanggiran nomae'. <sup>37</sup>Kasi notaka a boyus ka' bokol munsumparak lalomna dua-ngan, tamban duangan iya'a boomo mosool. <sup>38</sup>Na tempo iya'a, ai Yesus pintanga' royot na batolopuasan namake tangunan. Mbaka' muritna ninsimpumo i ia, ka' nobatundun na ko'ona, taena, "Guru, ai kuu tongko' royot, kita mbase boomo silaka'."

<sup>39</sup>Ai Yesus nowangonmo, ka' nongkokundakon boyus iya'a ka' nimbisarai danau, taena, "Rokot, alia gumiok!" Uga' norokotmo a boyus ka' danau iya'a sianmo nogumiok. <sup>40</sup>Kasi i Yesus nobisara na muritna, taena, "Nongko'upa i kuu se' matakut tuu' koiya'a? Nongko'upa i kuu se' sian parasaya i yaku?"

<sup>41</sup>Raaya'a natakutmo tuu', ka' nopootundunii simbaya'na, taena, "Se' mian koi'upa inta iya'a? Mombuul tia danaupo momorongori i ia!"

**Yesus numbuse'i meena biai' men  
nangalampingi samba Gerasa  
5:1-20**

(Mat. 8:28-34; Luk. 8:26-39)

**5** Ari Yesus notakamo na sambotakna danau na dodongoanna lipu' Garasa. <sup>2</sup>Baasi nolumobos i Yesus, liuliu notaka a sa'angu' mian moro'one ndara'amari na tempat bakuburan. Mian iya'a ia lampingi meena, <sup>3</sup>ka' dodongoanna mian iya'a na leeng. Sianta sa'angu' mian a men mamaka'ala mongkoot i ia,

4:31 sasawi: Sasawi men ningaan kani'i tumuo' na dodongoanna samba Yahudi, ka' sasawi iya'a sa'angu' aso'asok men tumuo' ko'alayo'na toro tolu' meter.

mau tia rante, <sup>4</sup>gause topiripiimo i ia nikalo' ka' nirante kasee rante tatakonna ka' kakalo' baraba'ionna. Mian iya'a bukuan tuu'; sianta sa'angu' mian a men mamaka'ala manganaami. <sup>5</sup>Ilio malom ia tongko' sayosayo waale'ele'emari leeng tia buu'na ka' mangkakarō' ka' membelai wakana tia watu.

<sup>6</sup>Oloapo a nontoa'ianna mian iya'a ai Yesus notaka, ia notumetende'mo ka' nonsoosa' na arop ni Yesus. <sup>7</sup>Boolak tuu' a wurungna nangkakarō'kon, taena, "Yesus, Anakna Alaata'ala Men Mangalabii Wiwi'na, upaioonmo i yaku' kani'i? Sumpa' tia ngaanna Alaata'ala, pa'ase'onku, amo' sakisaaon i yaku'." <sup>8</sup>Mbali koiya'a a norobuna gause i Yesus norobu na mian iya'a, taena, "Meena men mangalampingi mian kani'i, uar!"

<sup>9</sup>Kasi ia pikirawar i Yesus a mian iya'a, taena, "Ime a ngaawan?"

Ia simbati mian iya'a, taena, "Ngaanku, ai Legion, gause i kai biai' tuu'." <sup>10</sup>Piribiai' i ia nokuma-kaase' ni Yesus kada' amo' posuu'on i raaya'a umuar na dodongoan iya'a.

<sup>11</sup>Karani' dodongoan iya'a isian bokiuk biai' tuu' kaekae' mansarak kumaan na tembanon. <sup>12</sup>Meena i raaya'a nama'ase' nai Yesus, taena, "Posuu'mo i kai balimba' na bokiuk karaatu'u, ka' patalai i kai mimin-soopi." <sup>13</sup>Ai Yesus maloos koiya'a. Meena i raaya'a no'umuar na mian iya'a ka' ninsoop nangalampingi bokiuk iraantu'u. Giigii' bokiuk salulus iya'a notumetende' ka' notumumbur na liu' liuliu na lalomna danau kasi nolomos. Kobiai'na a bokiuk iya'a toro rua' loloon.

<sup>14</sup>Mian men nandagai bokiuk i

raaya'a notumetende'mo ka' nonto-lelekon lele iya'a na kota tia na libutan men poobeelanna. Ka' no'umuar a mian biai' mae' mimiile' upa men notolele iya'a. <sup>15</sup>Mian biai' iya'a notaka ni Yesus ka' nimiile' mian iya'a men koi umba'ana ia lampingi meena biai' iya'a, damo ndo'o oru'-oruang. Ia nobapakemo ka' nopatotongmo. Mbaka' nopatakutmo i raaya'a. <sup>16</sup>Mian men nansakisii wawau iya'a muntundunkon na ko'ona i raaya'a upa men nosida na mian men ia lampingi meena ka' uga' na bokiuk men biai' iya'a. <sup>17</sup>Kasi tombono dodongoan iya'a nama'ase' i Yesus kada' daa bi pamarerei dodongoan iya'a.

<sup>18</sup>Tolakit i Yesus na duangan, mian iya'a men ia lampingi meena umba'a, nama'ase'mo kada' lumolo' i Yesus.

<sup>19</sup>Kasee i Yesus sianta nomoturang. Tae ni Yesus, "Ule'kon ka' bantilkon potoutuus a upa men ia wawau Tumpu na ko'oom, ka' polingu'na na ko'oom."

<sup>20</sup>Mian iya'a uga' nomae'mo ka' nuntundunkon na lipu' Dekapolis iya'a wawau nai Yesus na ko'ona. Wiwi'na mian men nongorongor tundunanna iya'a nosamba'.

**Yesus nomotuo'i anak ni Yairus ka' nengelesi'i wiwine men mariingi'on**

**5:21-43**

(Mat. 9:18-26; Luk. 8:40-56)

<sup>21</sup>Ai Yesus nolumakit na duangan ka' no'umule'konmo soosodo na sambotakna danau. Dauga' indo'o na soripi'na danau i ia, noruuruubanmo a mian taka munguruuti i ia. <sup>22</sup>Taka a sa'angu' mian ai

Yairus a ngaanna. Ia moomoola'na mian men mungurus laigan ba'ibadatan. Tongko' ia piile' se' i Yesus, ia liuliu nobasoosa' na aropna. <sup>23</sup>Ia nokumakaase' nai Yesus, taena, "Anakku wiwine manggeo' tuu', boomo lapus. Taka walinta ka' mengepetkon limamuu na wakana, kada' malesi', dako' lapus i ia."

<sup>24</sup>Ai Yesus uga' nomae'mo singka-singkat tii Yairus. Biai' a mian mongololo' i ia tamban poseeseet tikutikum.

<sup>25</sup>Na tanga'na mian biai' iya'a isian sa'angu' wiwine men sompu'lo'mo rua' taun a nanggeoanna maringi'on. <sup>26</sup>Biai'mo a mian namakuli' a wiwine iya'a tamban kabus a kupangna nambayar nobapakuli'anna, see siasianapo nalesi', tongko' kaekae' ka' dodoa a nggeona. <sup>27</sup>Ia nongorongormo lelana upa men wawauon ni Yesus. Mbaka' na tanga-tanga'na mian biai' iya'a, ia nembeeli i Yesus see paraas tokurungna, kasi nongkoyong bokukum dubana, <sup>28</sup>gause na noana, taena, "Mau tongko' koyongonku a bokukum dubana, malesi' i yaku'."

<sup>29</sup>Tongko' liuliu iya'a uga' rokot a mariingi'na. Ia nunsuri a wakana se' nalesi'mo. <sup>30</sup>Singkat iya'a uga' ai Yesus nunsuri se' isian kakuatanna men no'umuar na wakana. Ia linga a mian biai' paraas tokurungna, ka' nimikirawar, taena, "Ime a men nongkoyong bokukum dubangku?"

<sup>31</sup>Murit-muritna norobu, taena, "Kuu daa nimiile' mian biai' tuu' kani' poseeseet, kadai i kuu dauga' mimikirawar se' 'I ime a men nongkoyong i yaku'?"

<sup>32</sup>Kasee i Yesus dauga' nintioki

tiku-tikum mansarak mian men nongkoyong i ia. <sup>33</sup>Wiwine men nalesi' iya'a ninginti'i upa men ia surimo na wakana. Ia nolantutukanmo natakut, ka' notaka na arop ni Yesus nobasoosa', ka' nambantilkon tuu-tuu'na upa men nosida na ko'ona. <sup>34</sup>Kasi i Yesus norobu na wiwine iya'a, taena, "Anakku, gause i koo parasaya na Ingku', koo malesi'. Rae' tia noa ma'amat. Koo nalesi'mo tuu'."

<sup>35</sup>Pintanga' morobu i Yesus, notaka a mian pii ira niposuu'ntu'umari na laigan ni Yairus, moomoola'na mian men mungurus laigan ba'ibadatan. Raaya'a nambantilkon ni Yairus, taena, "Anakmu nolapusmo. Sobümo ka' mompoposusa i Guru soosodo."

<sup>36</sup>Yesus sianta nomorongori upa men ia tundun mian i raaya'a. Ia nobisara nai Yairus, taena, "Alia matakut, tongko' parasaya." <sup>37</sup>Yesus liuliu nomae' na laigan ni Yairus sec sianta namatalai mian sa'asa'angu'ipo mongololo' i ia. Men sida mongololo', tongko' i Petrus tii Yakobus ka' i Yohanes, utusna. <sup>38</sup>Notakamo i raaya'a na laigan ni Yairus, ia piile' a mian se' sianmo ni'inti'-inti'i, ka' ia rongor a wirina mian tia tando' boolak. <sup>39</sup>Yesus liuliu ninsoop ka' norobu na ko'ona i raaya'a, taena, "Nongko'upa se' gora' tuu' koi kani'imari ka' wiri? Anak kanono' sianta nolapus; ia tongko' noroyot."

<sup>40</sup>Ia kolengkei i raaya'a i Yesus. Ia posuu' i Yesus i raaya'a wiwi'na umuar, kasi ia wawa a sinana tia tamana anak iya'a, ka' muritna tolu' tolu'na ninsoop na tokolanna anak iya'a. <sup>41</sup>Ia intoni i Yesus a

limana anak iya'a, kasi ia bisarai, taena, "Talita kum," men aratina, igo', yaku' morobu na ko'oom, wangonmo.


<sup>42</sup>Anak wiwine iya'a liuliu niwangan ka' notumumpang. Tuo'-anna anak iya'a sompulo'mo rua' taun. Wiwi'na mian men damo raando'o nosamba' tuu' nimiile' koiya'a. <sup>43</sup>Kasee wawauna men iya'a sianta tuu' patalaion ni Yesus tundunon na mian sanggiran. Kasi ia posuu' a mian i raaya'a mantarai anak iya'a kumaan.

**Yesus sianta ia laboti mian na  
Nasaret**

**6:1-6**

(Mat. 13:53-58; Luk. 4:16-30)

**6** Ai Yesus namarerei dodongoan iya'a ka' nomae' tia murit-muritna na kampung men dodo-ngoanna. <sup>2</sup>Na ilio Sabat, ai Yesus ninsoop na laigan ba'ibadatan, ka'



*Dudusna lalomna laigan ba'ibadatan*

nuntumbei mimisiso' mian biai' indo'o. Raaya'a nosamba' tuu' nongorongor pimisiso' ni Yesus. Taena i raaya'a, "Men koi kaya'-amari wiwi'na, mariana a nantau-sianna mian kaya'a? Koi'upa inta' a pinginti'ian men isian na mian kaya'a? Koi'upa se' daa sidaonna a mangawawau upa men kosamba'?" <sup>3</sup>Taasi' tukang kau i ia kani'i, men anak ni Maria, ka' moto'utus tii Yakobus, ka' i Yoses, ka' i Yudas, ka' i Simon? Ka' utu-utusna men wiwine taasi' uga' isian iraani'i poododongoi tii kita?" Gause iya'a mbali' nokokoo'an i raaya'a ka' sianta ia laboti i raaya'a i ia.

<sup>4</sup>Yesus norobumo na ko'ona i raaya'a, taena, "Sa'angu' nabii mau mbariana angga'ionna mian, tongko' na kampung men dodongoanna, tia na tanga-tanga'na potu'utusanna tia minti'ina, sian angga'ion."

<sup>5</sup>Na dodongoan iya'a, ai Yesus sian sida nangawawau sa'asa'-angu'ipo upa men kosamba', saliwana nengelesi'i mian men mang-geo bangar pii ira, men ia cpet i Yesus tia limana. <sup>6</sup>Kinosamba' ni Yesus kadai i raaya'a se' sianta mamarasaya.

6:4: Yoh. 4:44

**Yesus nomosuu' muritna men  
sompulo' rua' mae' mengelelekon**

**Lele Pore**

**6:6-13**

(Mat. 10:5-15; Luk. 9:1-6)

Noko daa iya'a, Yesus nomae'mo na kampung tiku-tikum men pooka-rani' ka' nimisiso' mian. <sup>7</sup>Ia leelo' a muritna sompu-sompulo' rua' irana, ka' niposuu' i raaya'a rua'-rua'.

Koo'po tia nomae', ia nantarai i raaya'a kuasa kada' bo pumbuse'i meena, <sup>8</sup>ka' ia nimisiso' i raaya'a koi kani'imari, taena, "Alia mangawawa upa-upa na rae'anmuu, tongko' tokon a daa sida. Alia mangawawa kakaan, kabai se' tuuman, ka' alia mamaa doi'. <sup>9</sup>Mamake sapato kasee alia mamaa bokukum rurua'." <sup>10</sup>Ia uga' norobu, taena, "Kalu kuu notuuk na laiganna mian, ka' ia laboti mian, dodongomo ino'o; alia balimba' pataka i kuu mamarerei dodongoan inono'. <sup>11</sup>Kasee kalu taka na sa'angu' dodongoan i kuu, ka' mian iraando'o sianta mangalaboti tia momorongori i kuu, parerei a dodongoan inono'. Taperi a awu na saratmuu kada' bi poo'inti'i i raaya'a se' Alaata'ala sianta sanaang."

<sup>12</sup>Murit ni Yesus sompusompulo' rua' irana nomae'mo nontolelekon se' manusia tiodaa mombolii na wawauna men ba'idek. <sup>13</sup>Raaya'a numbuse'i meena biai' ka' nenggegesi tia likisonna saitun mian men manggeo kada' malesi'.

6:8-11: Luk. 10:4-11 6:11: Kis. 13:51  
6:13: Yak. 5:14

**Yohanes Pansarani ia papatei mian  
6:14-29**

(Mat. 14:1-12; Luk. 9:7-9)

<sup>14</sup>Ngaan ni Yesus notolelemo longko-longkop, tamban wiwi'na upa men ia wawau i Yesus uga' notadul a lлена ni Tomundo' Herodes.<sup>#</sup> Isian mian men nuntundun i Yesus, taena, "Se' ai Yohanes Pansarani

notumuo'mo soosodo. Ya'a mbali' mba'a i ia isian pinginti'ianna mangawawau upa men kosamba'."

<sup>15</sup>Kasee mian sanggiran nuntundun, taena, "Nono' i ia, ai Elia."

Isian uga' men nangaan, taena, "Ia kanono', nabii, koikoimo tia nabii mbaripi."

<sup>16</sup>Ia rongor i Herodes se' koiya'a, ia norobumo, taena, "Sabole-bole i Yohanes Pansarani ini'i, men mbaripi yaku' kolongimo a takala'na. Koini'i notuo'mo soosodo i ia!"

<sup>17</sup>Olukonanpo, ai Herodes isian nomosuu' mian nangarakop i Yohanes ka' nonsoopkon na tarungkuan. Mbali' ia wawau i Herodes koiya'a gause i Herodias, boroki' ni Pilipus. Ai Herodes nangarampasimo boroki'na utusna ka' nomosuo'i i Herodias. <sup>18</sup>Ka' wawau ni Herodes men iya'a piribiai'mo ia kokundakon i Yohanes. Koi kani'imari a taena, "Sian sida i koo mosuo' tia boroki' na utuus kanono'."

<sup>19</sup>Koiya'a mbali' mba'a i Herodias nanganaa' na noana maso'na ni Yohanes, ka' kokira'na papateion i Yohanes, see sian pookonna tuukonon gause salangion ni Herodes. <sup>20</sup>Ai Yohanes katakut ni Herodes, gause ia inti'i i Herodes se' i Yohanes sa'angu' mian men maloos ka' sian sala'na. Ka' tundunan ni Yohanes mau kosiasana noana i Herodes, kasee uga' kokira'na rongoron. Ya'a mbali' ia posuu'kon i Herodes mian kada' mandagai i Yohanes pore-pore dako' silaka'.

<sup>21</sup>Mbaka' daa taka uga' a sa'angu' tempo men ma'amat bo ni

**6:14 Tomundo' Herodes:** Herodes iya'a, Herodes Antipas, men tanaas na Galilea mbaripi.

Herodias. Tempona iya'a ai Herodes mangaramekon ilio men nongamea'anna. Na tempo iya'a uga' i Herodes nangawawau ramean bona giigii' moomoola'na batomundo'anna, ka' moomoola'na surudaduna, ka' mian men angga'ion na Galilea. <sup>22</sup>Na ramean iya'a, anak ni Herodias men laandue' no'umosulen. Osulenna iya'a kinsanaangna tuu' noa ni Herodes tia giigii' sawe'na. Tomundo' Herodes nobatundun na laandue' iya'a, taena, "Aupa men kokira'am, tongko' pa'ase'; daa, rookononku i koo." <sup>23</sup>Wurung iya'a ia basumpa'kon i Herodes a nontoonkon laandue' iya'a. Tae ni Herodes, "Mau upa men pa'ase'oon, rookononku, tamban mau batomundo'ankupo sambotak, rookononku!"

<sup>24</sup>Wiwine laandue' iya'a no'umuar ka' nimikirawar na sinana, taena, "Mama, upa inta' a men pore bo pa'ase'onku?"

Ia simbati sinana, taena, "Pa'ase' a takala' ni Yohanes Pansarani."

<sup>25</sup>Wiwine laandue' iya'a liuliu no'umule'kon na Tomundo' ka' nobatundun, taena, "Pa'ase'onku a takala' ni Yohanes Pansarani, rookononmuu i yaku' koikoini'ina tanaon na dulang."

<sup>26</sup>Ia rongor i Tomundo' se' koiya'a a pa'ase'na, liuliu nasiongo' tuu' i ia. Kasee sian pokoonna koo'konon a pa'ase'na wiwine laandue' iya'a gause ia basumpa'konmo na aropna sawe'na. <sup>27</sup>Mbaka' somo liuliu ia posuu'kon dadagana sa'angu' mae' mondolo' takala' ni Yohanes Pansarani. Mian men niposuu' iya'a nomae'mo na tarungkuan, liuliu nongkolongi takala' ni

Yohanes. <sup>28</sup>Noko daa koiya'a, ia wawamo a takala' iya'a na wawona dulang ka' nirookon na wiwine laandue' iya'a. Wiwine laandue' iya'a nongorookon soosodo takala' iya'a na sinana. <sup>29</sup>Lolo' ni Yohanes nongorongor lele koiya'a, ia rae'imo i raaya'a ka' nidolo' a biibii ni Yohanes, ka' nungkuburkon.

6:14-15: Mat. 16:14, Mrk. 8:28, Luk. 9:19  
6:17-18: Luk. 3:19-20

### Yesus namakaan mian lima' loloon 6:30-44

(Mat. 14:13-21; Luk. 9:10-17; Yoh. 6:1-14)

<sup>30</sup>Murit-murit men ia posuu' i Yesus iya'a no'umule'konmo soosodo ka' nobaruru'mo tii Yesus. Raaya'a nambantilkon nai Yesus giigii' upa men ia wawaumo i raaya'a, ka' men ia pisiso'kon i raaya'a na mian. <sup>31</sup>Biai' tuu' a mian taka tia mae', tamban sianmo minsida kumaan i raaya'a. Somo taena i Yesus na murit-muritna, "Mai, kita mae' na tampat men daa sianta mianna men daa some kita-kitana kada' sida mintimalé kodi-kodi' i kuu." <sup>32</sup>Raaya'a nomae'mo nobaduangan raaraaya'ana na tampat men daa sianta mianna.

<sup>33</sup>Kasee biai' a mian men nimiile' i raaya'a nomae' ka' ia inti'i mian i raaya'a uga' a rae'anna. Mbaka' na wiwi'na kota na dodongoan iya'a isian mian notumetende' nogintano', nonggolot i Yesus tia murit-muritna. <sup>34</sup>Baasi nalawu i Yesus na duangan, ia piile' se' biai' a mian. Kinolingu' ni Yesus i raaya'a gause i raaya'a somo koi domba men sianta mian nontotobo'. Liuliu biai' kaliangan a ia pisiso'kon i Yesus na ko'ona i

raaya'a.

<sup>35</sup>Maamaalommo a ilio, murit-murit ni Yesus nobisaramo na ko'ona, taena, "Koini'i boomo malom, ka' tampat kani'i oloa mian.

<sup>36</sup>Mbulo posuu' a mian karaani'i bi rae' kada' minsida mingili kakaan na libutan tia kampung-kampung men kara-karaani' ini'i."

<sup>37</sup>Kasee i Yesus ninsimbati, taena, "Kuumo a mantarai i raaya'a kakaan."

Taena i raaya'a, "Ansee, kada' kaimo a mingili kakaan bona mian biai' koi kani'i, tiodaa mamara-luukon doi' men taasi' titiu'? Kita tiodaa mamake koi rua atu' doi' perak."#

<sup>38</sup>Ia pikirawar i Yesus na ko'ona i raaya'a, taena, "Pipii a roti men daa isian na ko'omuu? Soba rae' piile'."

Ia piile' i raaya'a. Taena i raaya'a, "Isian roti lilima' ka' susum rurua'."

<sup>39</sup>Liuliu ia posuu' i Yesus a mian i raaya'a wiwi'na umoruang sarimpung-sarimpung na rakut malalas. <sup>40</sup>Mian i raaya'a no'umoruangmo pore-pore sarimpung-sarimpung. Isian men sa'atu mian a sarimpung, isian uga' men limampulo' mian a sarimpung. <sup>41</sup>Noko daa iya'a, ia alamo i Yesus a roti men lilima' ka' susum men rurua' iya'a, ka' nolumclengea' na langit ka' nobaselele' na Alaata'ala. Noko daa koiya'a, ia rumpi-rumpikmo a roti iya'a, kasi ia rookon na murit-muritna kada' bo obo'-oboskonon na mian biai' i raaya'a. Ka' susum men rurua' iya'a uga' ni'obo-oboskon

na ko'ona i raaya'a wiwi'na. <sup>42</sup>Raaya'a nobenteng wiwi' irana nangkaan. <sup>43</sup>Ka' tarana kakaan iya'a ia ruru' murit-murit ni Yesus, wiwi'na dauga' sompulo' rua' basung a nobuke'. <sup>44</sup>Mian moro'one# men nangkaan roti iya'a isian toro lima' loloon mian.

6:34: Bil. 27:17, 1Raj. 22:17, 2Taw. 18:16, Yeh. 34:5, Za. 10:2, Mat. 9:36

### Yesus notumumpang na wawona weer

6:45-52

(Mat. 14:22-33; Yoh. 6:15-21)

<sup>45</sup>Noko daa koiya'a, liuliu ia posuu' i Yesus a murit-muritna mae' baduangan mongolukoni i ia na Betsaida na sambotakna danau, ka' mian men biai' iya'a, ia posuu'mo mule'kon. <sup>46</sup>Tongko' ia parcrei i Yesus a mian biai', ai ia liuliu nomae' na buu'na ka' nobarado'a. <sup>47</sup>Na tanga-tanga'namo danau a duanganna murit-murit ni Yesus, ilio nomalommo. Kasee i Yesus dauga'na na tano'. <sup>48</sup>Ia toa'i i Yesus i raaya'a se' marepa tuu' a mombose duanganna gause mombuulon ra'amari na aropna duangan. Mbaka' toro jam tiga karani' ilio, ai Yesus notakamo na ko'ona i raaya'a, notumumpang na wawona weer, koikoi se' mingkira' mingiliukon i raaya'a. <sup>49</sup>Ia piile' i raaya'a se' i ia notumumpang na wawona weer, ia saruimo i raaya'a i ia, se' meena. Mbaka' i raaya'a nangkakaro'mo natakut, <sup>50</sup>gause wiwi' irana

6:37 dol' perak: Sa'angu' doi' perak koi tambona mian men balimang sangilio (piile' na Matius 20:2).

6:44 mian moro'one: Na Matius 14:21 nitundunkon se' men nangkaan roti iya'a lima' loloon mian moro'one saliwana wiwine ka' anak morio'.



tongkodi' tuu' nimiile' i ia.

Kasee i Yesus liuliu norobu na ko'ona i raaya'a, taena, "Pimpokot! Yaku' ai Yesus. Alia matakut." <sup>51</sup>Liuliu nasawe' na duanganna i raaya'a i ia, ka' mombuul uga' norokotmo. Samba' tuu' a murit-murit ni Yesus, <sup>52</sup>gause siansiannapo arationna i raaya'a a roti lilima' men kosamba' iya'a. Noana i raaya'a sianpo laan mongololo' i Yesus.

Yesus nengelesi'i mian biai' na lipu'

Genesaret

6:53-56

(Mat. 14:34-36)

<sup>53</sup>Notakamo na sambotakna danau, i raaya'a nolumobosmo na Genesaret. <sup>54</sup>Sarataa i raaya'a no'umuar na duangan, liuliu ia inti'i mian biai' se' ai Yesus a men notaka. <sup>55</sup>Mbaka' mian i raaya'a notumetende'mo longko-longkop dodongoan iya'a ka' nengelelekon se' i Yesus notaka, ka' ia wawa i raaya'a giigi' mian men mabarang ni'uer ti ampa-ampasna mae' ni Yesus. Ka' rongoronna i raaya'a i Yesus se' na tempatmo sa'angu'an, wawaonna i raaya'a a mian men mabarang iya'a waatu'u. <sup>56</sup>Mau mbaria kotakaan ni Yesus, mau na kampung, mau na kota kabai se' na libutan, na tempat inono' pokelaionna i raaya'a mian men mabarang na pasar. Ka' pa'ase'onna i raaya'a kada' daa mian men manggeo pataion mongkoyong bokukum duba ni Yesus, mau tongko' puusna. Wiwi'na men nongkoyongm<sup>o</sup> sida nalesi'.

Yesus nompoposala' agamana  
Yahudi men sianta mongololoikon  
parentana Alaata'ala

7:1-13

(Mat. 15:1-9)

**7** Mian Parisi tia wawa ukum Torat toropii ira men na Yerusalem a dodongoanna notaka nai Yesus. <sup>2</sup>Raaya'a nimiile' murit ni Yesus toropii ira nokumaan see sianta nongoso'i limana men koi taena agamana.<sup>#</sup>

<sup>3</sup>Inti-inti'imo a mian Parisi tia samba Yahudi wiwi'na mongololoikon tuu' adat tia wawauna minti'ina i raaya'a. Raaya'a sianta kumaan kalu sianpo nongoso'i lima koi men ia pisiso'kon minti'ina i raaya'a. <sup>4</sup>Ka' umule'kon na pasar i raaya'a sianta kumaan kalu sianpo nimbirisii wakana. Ka' dauga'na biai' a aturan sanggiran na minti'ina i raaya'a men intonionna i raaya'a moonggor tuu', koimo na aturan mongoso'i galaas, mangko', ka' pakakas men tambaga.

<sup>5</sup>Koiya'a mbali' mian Parisi tia wawa ukum Torat nimikirawar ni Yesus, taena i raaya'a, "Nongko'upa a murit-muriit se' kumaan tia lima men sian ni'oso'i? Nongko'upa i raaya'a se' sian mongololoikon adatna minti'inta?"

<sup>6</sup>Ia simbati i Yesus, taena, "Kuu karaani'i uga' se' mian umakal! Tuutuu' a Wurungna Alaata'ala mangkana'i i kuu men ia tulis i Nabii Yesaya, taena, 'Mian karaanono' tongko' monsoosa' i yaku' tia wurung, see na noana i raaya'a, oloa na ingku'. <sup>7</sup>Sianta kana'na i

7:2 taena agamana: Pisiso'na agama Yahudi se' mian men sianta mongoso'i lima ka' sianta mongololoikon aturan men sanggiran sida marere na aropna Alaata'ala.

raaya'a monsoosa' i yaku' gause aturan na manusia a pisiso'kononna dogi' se' aturan iya'a a aturanku.'

<sup>8</sup>Parentana Alaata'ala kauri'-kononmuu kasee aturanna manusia a men moonggor a pingintonimuu."

<sup>9</sup>Kasi i Yesus norobu soosodo, taena, "Kuu minsida tuu' mongoloakon parentana Alaata'ala kada' daa pokoonmuu a mamakapoonggor pisiso'muu suungmuu!"

<sup>10</sup>Nai Musa koi kani'imari a parentana, taena, 'Angga'i a tama tia sinamuu,' ka', taena, 'Ai ime a men mingideki minti'ina tiadaa pate a ukumanna.'

<sup>11</sup>Kasee ko'omuu koi kani'imari a nimisiso'muu, taemuu, "Kalu mian nomorobui minti'ina, taena, 'Upa men bookoi rokononku bo ko'omuu nirokonmo bona Alaata'ala.'" <sup>12</sup>Mian iya'a sianta patalaionmuu mongololoikon wawauna muntulung tama tia sinana.

<sup>13</sup>Mbaka' tia pisiso'muu suungmuu men kuu pisiso'kon mian, kuu nompopenta'mo wurungna Alaata'ala. Ka' dauga'na biai' a upa men koiya'a wawauonmuu."

7:6-7: Yes. 29:13 7:10: Kel. 20:12, 21:17, Im. 20:9, Ul. 5:16

**Yesus nimisiso'kon upa men mengerere mian na aropna**

**Alaata'ala**

**7:14-23**

(Mat. 15:10-20)

<sup>14</sup>Ka' ia leclo' i Yesus soosodo a mian biai' i raaya'a, kasi norobu i ia, taena, "Porongori pore-pore kada' arationmuu. <sup>15</sup>Upa men na liwa ka' minsoop na wakana mian sianta mengerere i ia, kasee ka' upa a men na lalom ka' umuar, nono'

a men mengerere. [<sup>16</sup>Ka' men daa tilingaan, porongori.]"

<sup>17</sup>Ia parereimo i Yesus a mian biai' iya'a, ka' ninsoop na laigan. Murit-muritna nimikirawar na Ko'ona, se' upa a paraluuna popiala iya'a. <sup>18</sup>Yesus norobu na ko'ona i raaya'a, taena, "Siasianapo uga' mangarati i kuu? Koo'po kuu inti'i se' upa men na liwa ka' minsoop na wakana mian sianta mangawawau i ia marere na aropna Alaata'ala?"

<sup>19</sup>Gause men minsoop na lalom inono' sianta minsoop na noa, kasee minsoop na kompong ka' uarkonon soosodo." Tia wurung men koiya'a, ai Yesus nambantikon se' wiwi'na kakaan sida kaanon.

<sup>20</sup>Yesus norobu soosodo, taena, "Men umuar na noana mian, nono' a men mengerere i ia. <sup>21</sup>Gause na lalomna noa a men uaranna pikiran ba'idek, mosuo' sambu-sambumo, mamangan, mampapatei mian,

<sup>22</sup>mosuo' tia samba-sambana mian, mongko'uusi upana mian, mangawawau men ba'idek, umakal, mongololoikon po'uusna noa, masindir, momotaekon, mintidaadaa, tabingal. <sup>23</sup>Wiwi'na men ba'idek iya'a na lalom a uaranna, ka' iya'a a men mangawawau mian sida marere na aropna Alaata'ala."

**Yesus ia parasaya sa'angu' wiwine men taasi' lipu' Yahudi**

**7:24-30**

(Mat. 15:21-28)

<sup>24</sup>Noko daa koiya'a, ia parereimo i Yesus a dodongoan iya'a ka' nomae' na dodongoanna lipu' Tirus. Ia ninsoop na laigan sangkau see ia ude' inti'ionna mian se' damo ndo'o i

ia. Kasee sian sidaonna mompopowuni wakana. <sup>25</sup>Isian sa'angu' wiwine men anakna ia lampingi meena. Ia nongorongor se' isian i Yesus; wiwine iya'a notakamo ka' nonsoosa' na arop ni Yesus. <sup>26</sup>Ia nama'ase' kada' i Yesus mumbuse'i meena men nangalampingi anakna. Wiwine iya'a samba Yunani, lipu' Penisia na Siria. <sup>27</sup>Yesus norobu na ko'ona, taena, "Anak a olukon pakaanon bi benteng. Sianta kana' a mangala kakaanna anak ka' balo'-konon na au'."\*

<sup>28</sup>Taena wiwine iya'a, "Indo' Tumpu, kasee au' na intuna meda'po mangkaan tara men tuongonna anak."

<sup>29</sup>Yesus norobu na ko'ona, taena, "Ka' koi kanooro'o a ninsimbatim, ule'kon i koo. Meena men nangalampingi anaak, no'umuarmo."

<sup>30</sup>Wiwine iya'a no'umule'konmo. Ia takai na laigan, anakna toko-tokol na tokolan, ka' meena iya'a tuutuu' uga' no'umuarmo.

**Yesus nengelesi'i sa'angu' mian men umu' ka' mabongol**  
7:31-37

<sup>31</sup>Noko daa iya'a, i Yesus nama-rereimo dodongoanna lipu' Tirus, ka' ningimputkon rare'na lumiu na Sidon mae' na danauna Galilea. Ia sumalan lumiu na dodongoan Sompulo' Kota. <sup>32</sup>Tongko' indo'o, isian mian nangawawa na Ko'ona sa'angu' mian men umu' ka' mabongol. Ia pa'ase' i raaya'a i Yesus mengepetkon limana na mian iya'a.

<sup>33</sup>Ia wawa i Yesus a mian iya'a daa somo raaraaya'ana, kasi ia nonsoopkon rangkumna na tilingana mian iya'a rua-ruambotakna. Kasi ia inori i Yesus ka' nikoyong a sila'na mian iya'a. <sup>34</sup>Noko daa koiya'a, ai Yesus nolumelengea'mo waara'a na langit ka' ninoa booboolak kasi norobu na mian iya'a, taena, "Epata," men aratina, "Koloaian!"

<sup>35</sup>Tilingana mian iya'a nopoorongormo ka' sila'na nolundengmo soosodo ka' ninsidamo bisara pore.

<sup>36</sup>Sianta pataion ni Yesus a mian wiwi'na muntundun wawau iya'a na mian sanggiran. Kasee koiya'amo i Yesus mongkokundakon mian muntundun, tongko' kaekae' ka' dodoa i raaya'a montolele'kon wawau iya'a.

<sup>37</sup>Wiwina mian men nongorongor iya'a nosamba' tuu'. Raaya'a norobu, taena, "Wiwina ia wawau, pore. Mian mabongol ia wawau sida nopoorongor, ka' mian umu', sida nobisara."

**Yesus namakaan mian paat loloon**  
8:1-10

(Mat. 15:32-39)

**8** Noko daa iya'a sianta nanau', isianmo soosodo mian biai' notaka barimpung. Gause sianmo kakaanna i raaya'a, ia leelo' i Yesus a murit-muritna ka' norobu, taena, <sup>2</sup>"Molingu' tuu' i yaku' na mian biai' karaani'i. Tolungiliomo i raaya'a damo raani'i tii yaku'. Koini' sianmo bo kakaanna i raaya'a. <sup>3</sup>Ka' posuu'onku i raaya'a umule'kon see mololu mbaka' laat poso' i aaya'a

7:27 anak...au': Paraluuna timbaani' ni Yesus koi kani'imari: anak, aratina, samba Yahudi, ka' na tempo ni Yesus, samba Yahudi nangaani mian men taasi' samba Yahudi koi au'.

na tanga'na salan. Daa i raaya'a isian men oloa a notakaanna."

<sup>4</sup>Ia simbati murid-murit ni Yesus, taena, "Dodongoan kani'i oloa mian. Koi'upa a pantausi kakaan men daa sukup bo kaanonna mian kani'i wiwi'na?"

<sup>5</sup>Yesus nimikirawar, taena, "Pipii a roti men isian na ko'omuu?"

Taena i raaya'a, "Pipitu'."

<sup>6</sup>Ia posuu'mo i Yesus a mian biai' iya'a umoruang na tano', kasi ia ala a roti iya'a pitu-pitu'na ka' nobaselele' na Alaata'ala. Noko daa koiya'a, ia rumpi-rumpikmo a roti iya'a ka' nirookon na murid-muritna kada' obo'-oboskononna i raaya'a na mian biai'. Murit-muritna uga' nongolo-loikonmo koiya'a. <sup>7</sup>Isian uga' susum morio' toropii na ko'ona i raaya'a. Yesus nobaselele' na Alaata'ala bona susum iya'a, kasi ia posuu' a murid-muritna nongobo-oboskon susum iya'a uga'. <sup>8</sup>Wiwi'na mian i raaya'a benteng nokumaan, ka' tarana roti men nikaan iya'a, niruru' dauga' pitu' basung a nobuke'. <sup>9</sup>Mian i raaya'a<sup>#</sup> isian toro paat loloon a kobiai'na. Kasi ia posuu' i Yesus i raaya'a umule'kon. <sup>10</sup>Kasi i Yesus tia murid-muritna liuliu nolumakit na duangan ka' nomae' na dodongoan Dalmanuta.

**Mian Parisi nama'ase' i Yesus mangawawau upa men kosamba' sanggiraanan**

**8:11-13**

(Mat. 16:1-4)

<sup>11</sup>Mian Parisi notaka ni Yesus bangar pii ira ka' nopoogagai tii Yesus. Raaya'a mingkira' monsobai i Yesus. Ia pa'ase' i raaya'a kada' daa i Yesus mangawawau upa men kosamba' men nda'amari surugaa na Alaata'ala. <sup>12</sup>Kinosusana noa ni Yesus a koiya'a. Liuliu ia simbati, taena, "Upa inta a mian na tempo koini'i, se' mama'ase' i yaku' mangawawau upa men kosamba'? Tuutuu' ini'imari wurungku, bona mian tempo koini'i, yaku' sianta mangawawau sa'angu' upa kosamba' men koiya'a."

<sup>13</sup>Liuliu ia parerei i Yesus i raaya'a, kasi ia nolumakit na duangan ka' nomae' na sambotakna danau iya'a.

8:11: Mat. 12:38, Luk. 11:16

8:12: Mat. 12:39, Luk. 11:29

**Yesus nompopialakon mian Parisi tii Herodes koi ragi**

**8:14-21**

(Mat. 16:5-12)

<sup>14</sup>Komburi'si ka' ni'inti'i se' murid ni Yesus, sianta namaa roti biai',

8:9 mian i raaya'a: Na Matius 15:38 nitundunkon se' men nangkaan roti iya'a paat loloon mian moro'one saliwana wiwine ka' anak morio'.

tongko' sa'angu' a rotina i raaya'a na duangan. <sup>15</sup>Yesus nompopo'imamat i raaya'a, taena, "Maka'amat i kuu na ragina mian Parisi tia ragi ni Herodes."#

<sup>16</sup>Raaya'a nopootundunii, taena i raaya'a, "Mbali' koiya'a a wurung ni Yesus gause i kita sianta namaa roti."

<sup>17</sup>Ia inti'i i Yesus a upa men pootunduniikononna i raaya'a. Mbali' iya'a, i Yesus nimikirawar na ko'ona i raaya'a, taena, "Nongko'upa i kuu se' mompootunduniikon sianta isian roti? Siasiannapo nopoo'inti'i ka' nangarati i kuu? Mokudul tuu' a noamuu. <sup>18</sup>Kuu mataan, nongko'upa se' sianta mimiile'? Kuu tilingaan, nongko'upa se' sianta poorongor? Sianmo kuu inau' <sup>19</sup>a roti lilima' men yaku' rumpi-rumpik bona mian lima' loloon? Pipii basung a nobuke' labina kakaan men kuu ruru'?"

Ia simbati i raaya'a, taena, "Sompulo' rua' basung."

<sup>20</sup>Ia pikirawar i Yesus soosodo, taena, "Tempona nungurumpi-rumpikanku roti pipitu' bona mian paat loloon, pipii basung a labina kakaan men kuu ruru'?"

Ia simbati i raaya'a, taena, "Pitu' basung."

<sup>21</sup>Tae ni Yesus soosodo, "Siasiannapo mangarati i kuu?"

8:15: Luk. 12:1 8:18: Yer. 5:21, Yeh. 12:2, Mrk. 4:12

**Yesus nengelesi'i mian mampisok  
na Betsaida  
8:22-26**

<sup>22</sup>Noko daa koiya'a, ai Yesus tia

muritna notakamo na Betsaida. Na Betsaida iya'a, isian mian nanga-wawa sa'angu' mian men mampisok nai Yesus, ka' nama'ase' kada' daa koyongon ni Yesus a mian men mampisok iya'a kada' daa lesi'ionna. <sup>23</sup>Mbaka' ia intonimo i Yesus a limana mian men mampisok ka' nibibit mae' na liwana kampung iya'a. Kasi ia inori i Yesus a matana mian iya'a, ka' nikoyong, kasi ia pikirawar, taena, "Piile'oonmo a upa-upa?"

<sup>24</sup>Mian iya'a nontoa'imo waatu'u ka' norobu, taena, "Indo'. Yaku' nimiile' mian pototumpang, see tongko' koi kau piile'onku."

<sup>25</sup>Ia koyong i Yesus soosodo a matana mian iya. Noko daa iya'a, mian men mampisok nopoopiile'mo tuu'. Nalesi'mo a matana ka' wiwi'na manasamo piile'onna. <sup>26</sup>Yesus norobu na ko'ona soosodo, taena, "Ulc'kon na laigaan, ka' alia motanga' kampung."

**Pangakuan ni Petrus na kokana'an  
ni Yesus  
8:27-30**

(Mat. 16:13-20; Luk. 9:18-21)

<sup>27</sup>Noko daa koiya'a, i Yesus tia murit-muritna nomae'mo na kampung-kampung men na lipu'na Kaisarea Pilipi. Na tanga'namo salan, ai Yesus nimikirawarimo murit-muritna, taena, "Ai ime a pinginti'ina mian biai' i yaku' kani'i?"

<sup>28</sup>Ia simbati muritna, taena, "Isian men nangaan ai Yohanes Pansarani. Isian uga' men nangaan ai Nabii Elia. Ka' mian sanggiran soosodo

8:15 ragina mian Parisi tia ragi ni Herodes: Ai Yesus nompopalakon wawauna mian Parisi ti Herodes koi ragi. Wawauna i raaya'a mambalaki'kon wawau men ba'idek.

nangaan kansala'anna sa'angu' nabii."

<sup>29</sup>Yesus nimikirawar na ko'ona i raaya'a soosodo, taena, "Kasee ka' na ko'omuu, ai ime i yaku' kani'i?"

Ia simbati i Petrus, taena, "Kuu Tomundo' men Pansalamatkon."

<sup>30</sup>Kasi ia popo'ingat i Yesus i raaya'a dako' muntundun\* na mian sanggiran kokana'anna wakana.

8:28: Mrk. 6:14-15, Luk. 9:7-8

8:29: Yoh. 6:68-69

**Yesus nuntundunkon  
kosansaraanna tia kopateanna ka'  
koi'upa men boo wawauon kada'  
sida mongololo' i ia**

**8:31 - 9:1**

(Mat. 16:21-28; Luk. 9:22-27)

<sup>31</sup>Noko daa koiya'a, i Yesus nuntumbeimo nimisiso' murit-muritna se' Anak Manusia tio mantaup san-sara biai' ka' kokundaionna tanatanaas tia moomoola'na imam ka' wawa ukum Torat. Ia bo papateion, kasee na ilio kotolu'na, ia bo tuo' soosodo. <sup>32</sup>Koiya'a a kanasana i Yesus nuntundunkon iya'a na murit-muritna. Kasee i Petrus nanga-wawa i Yesus waale'e na soripi'na ka' nongkororo. <sup>33</sup>Yesus ningilinga ka' nangarop murit-muritna, kasi nongkomaso'i i Petrus, taena, "Kumbaale'ena i koo, Ibiliis. Po'uuwus kanono' po'uusna manusia, taa-si' po'uusna Alaata'ala."

<sup>34</sup>Noko daa koiya'a, ia leelo'mo i Yesus a murit-muritna tia mian biai' men damo raando'o, kasi norobu i ia, taena, "Mian men mingkira' mongololo' i yaku' tiodaa mongkolimbo'kon paraluuna wakana ka' mamasa'an saliip, kasi mongololo' i yaku'." <sup>35</sup>Mian men mompopobalaki' ka' mompopo'olukon tutuo'na sianta boo salamat, kasee mian men mongorookon tutuo'na bo ingku' tia bona Lele Pore na Alaata'ala, nono' a men salamat. <sup>36</sup>Aupa ka'untunganna mian mau ia nontombonoi longkop dunia kani'i kasee tutuo'na sian salamat? <sup>37</sup>Sianta isian upa men umangga' men sida pombolosi tutuo'na.

<sup>38</sup>Kalu sa'angu' mian makamaa' mangaku i yaku' tia pisiso'ku na tempo men ba'idek kani'i, men isian mian tabingal na Tumpu, Anak Manusia uga' makamaa' mangaku mian inono' na tempona kota-kaanna soosodo tia kuasana Tamana ka' lolo'onna malaa'ikat men molinas."

**9** Taena i Yesus, "Kada' bo inti'ionmuu, na kansala'anna i kuu men damo karaani'i, tuutuu' isian men sianpo lapus kalu sianpo nimiile' Batomundo'anna Alaata'ala taka tia kuasana."

8:34: Mat. 10:38, Luk. 14:27

8:35: Mat. 10:39, Luk. 17:33, Yoh. 12:25

**8:30 dako' muntundun:** Ia sarui mian biai' na tempo ni Yesus se' Tomundo' Pansalamatkon men nitoonkon bo sida Tomundo'na i raaya'a men membebaskon lipu' Yahudi na Batomundo'anna samba Romawi. Kasee ai Yesus minginti'i se' i ia tio pate kutung, kasi tuo' soosodo.

**Yesus waara'a buu'na ka' nilabikon  
mian wiwi'na  
9:2-13**

(Mat. 17:1-13; Luk. 9:28-36)

<sup>2</sup>Koi noommo ilio a noporusanna, ai Yesus nangawawamo i Petrus tii Yakobus ka' i Yohanes mintirensa raaraaya'ana na buu'na sa'angu' men alayo'. Kasi dudus ni Yesus noko-boliian na aropna i raaya'a. <sup>3</sup>Pakeanna nosidamo bubulak laangan. Sianta sa'angu' mian na dunia kani'i a men mamaka'ala mantatapi koiya'a a kobulakna. <sup>4</sup>Noko daa koiya'a, tolu-tolu' muritna nimuile' i Elia tii Musa men kaekae' batundun tii Yesus. <sup>5</sup>Mbaka' nobisaramo i Petrus nai Yesus, taena, "Guru, ma'amat tuu' i kita ka'ita. Mbulo kai momokerer laigan morio' totolu', sa'angu' bo ko'omuu, sa'angu' bo ni Musa, ka' sa'angu' soosodo bo ni Elia." <sup>6</sup>Ai Petrus nobatundun koiya'a gause ia tia samba-sambana rua-rua'na nopatakutmo tuu', mbali' sianmo ia inti'i se' upa men bo tun-dunonna.

<sup>7</sup>Noko daa koiya'a, ia sa'upimo antong i raaya'a, ka' na antong iya'a, ia rongor i raaya'a isian wurung, taena, "Kani'imo a anakku men kolinu'ku; porongori i ia." <sup>8</sup>Tongko' sangkidop, tempo i raaya'a nengelealokon na tiku-tikumna i raaya'a, sianmo mian sanggiran, somo i Yesus suungna indo'o.

<sup>9</sup>Tempona i raaya'a notumokuru na buu'na iya'a, ia potoo i Yesus i raaya'a, taena, "Alia pambantikon kuu nai ime-imepo a upa men kuu

piile' umba'a kalu sianpo Anak Manusia nopate ka' tumuo' soosodo." <sup>10</sup>Potuum iya'a ia tontoni i raaya'a, kasee raaraaya'amo muntumbeimo mompootunduniikon se' upa paraluu ni Yesus mangaan "nopate ka' tuo' soosodo."

<sup>11</sup>Ia pikirawar i raaya'a ni Yesus, taena, "Nongko'upa a wawa ukum Torat nuntundun se' i Elia tiadaa taka olukon# koo'po tia kota-kaanna Tomundo' Pansalamatkon?"

<sup>12</sup>Ia simbati i Yesus, taena, "Ai Elia tuutuu' taka olukon, kada' wiwi'na bi toropot. Kasee koi'upa a tia Anak Manusia? Nongko'upa se' na lalomna Alkitaap nitulis se' i ia bo munsuri sansara ka' idekionna mian? <sup>13</sup>Kasee bantilkononku na ko'omuu ai Elia noko takamo, ka' mian biai' nangawawaukon i ia tia po'u-po'uusna i raaya'a. Nono' kana'mo tia men nitulismo na Alkitaap a upa men mangkana'i wakana."

9:2-7: 2Ptr. 1:17-18

9:7: Mat. 3:17, Mrk. 1:11, Luk. 3:22

**Yesus numbuse'i meena na anak  
men ia popo'umu' meena  
9:14-29**

(Mat. 17:14-21; Luk. 9:37-43a)

<sup>14</sup>Tempona i Yesus tia muritna tolu-tolu'na raando'omo tia muritmuritna men sanggiran, ia piile' i raaya'a biai' a mian ningiriwuti iraando'o. Isian toropii wawa ukum Torat pintanga' poogagai tia muritmurit ni Yesus. <sup>15</sup>Sarataa ia too-

9:11 Ella tiadaa taka olukon: Na Maleakhi 4:5-6 nitundunkon ai Elia bo taka mongolukoni Tomundo' Pansalamatkon, ka' na Matius 11:13-14, ka' Matius 17:12-13 nitundunkon se' ai Yohanes Pansarani, ia men ngaanon i Elia.

piile' mian i raaya'a se' isian i Yesus, nosamba' tuu' i raaya'a. Liuliu notu-metende' mae' nangalaboti. <sup>16</sup>Yesus nimikirawar na murit-muritna, taena, "Upa iraaro'o men poogagai-kononmuu tia wawa ukum Torat?"

<sup>17</sup>Na tanga'na mian biai' iya'a, sa'angu' a mian men ninsimbati, taena, "Guru, yaku' nangawawa anakku na ko'onta. Anakku iya'a ia popo'umu' meena. <sup>18</sup>Sarataa takaionnamo, mbaka' wawauonna meena iya'a kada' anakku mangkairimpa' na tano', nganga'na wura'on, mokoroit a wese'na, ka' wakana sida moroson. Yaku' nama'ase' na murit-muritmuu moki buse'ikon meena iya'a, kasee sianta ia poko sida i raaya'a nibuse'i."

<sup>19</sup>Yesus norobu na ko'ona i raaya'a, taena, "Alia uga' i kuu mian men na tempo koini'i! Kuu karaani'i a tuutuu' sian mamarasaya. Taka ipi i yaku' dumodongo tii kuu ka' basabar na ko'omuu? Wawa a anak inono' le'emari." <sup>20</sup>Anak iya'a ia wawakonmo i raaya'a ni Yesus.

Tongko' ia toopiile' meena iya'a i Yesus, ia rosonkonmo meena a wakana anak iya'a, liuliu tinombabas, kasi tongkolinda' na tano'. Nganga'na wura'on. <sup>21</sup>Ia pikirawar i Yesus na tamana anak iya'a, taena, "Koi'upamo a nau'na i ia nokoi kaya'a?"

Ia simbati tamana, taena, "Dauga'napo itiu' i ia. <sup>22</sup>Isianmo topiripii a meena mongko'uusi mampapatei i ia. Isian men ia babaskon

na apu, ka' isian men na lalomna weer. Kasee kalu pokoonta tulungon, kologu'i i kai, alinta, ka' tulung i kai."

<sup>23</sup>Ia simbati i Yesus, taena, "Upa a taemuu umba'a, kalu pokoonta? Wiwi'na upa-upa pokoon asar mian parasaya." <sup>24</sup>Tamana anak iya'a liuliu nangkakaro', taena, "Yaku' parasaya, tulung i yaku' kada' yaku' parasaya tuutuu'."

<sup>25</sup>Ia piile' i Yesus se' kaekae' biai' a mian taka moruuruut, mbaka' ia nobisaramo nomosuu' meena iya'a, taena, "Hee, koo meena men nombongoli tia nompopo'umu', uar na anak kani'i, ka' aliamomo' mungule'i soosodo i ia."

<sup>26</sup>Meena iya'a nangkakaro' ka' nompoporoson tia nunggugurkon wakana anak iya'a, kasi no'umuar a meena iya'a. Anak iya'a somo koi mian pate piile'on, tamban mian biai' norobu, taena i raaya'a, "Daamo, patemo ile'e i ia." <sup>27</sup>Kasee i Yesus ningintoni limana anak iya'a ka' nangawangonkon. Anak iya'a uga' nokumekerermo.

<sup>28</sup>Na laiganmo i Yesus, notakamo a murit-muritna somo raa-raaya'ana, ka' nimikirawar na ko'ona, taena, "Nongko'upa i kai se' sianta nomoko numbuse'i meena iya'a?"

<sup>29</sup>Ia simbati i Yesus, taena, "Meena men koiya'a, tongko' do'a\* a men sida pumbuse'i. Sianta sida tia upa sanggiran."



**Kopinduanna i Yesus  
nuntundunkon kokopateanna tia  
kotuo'anna soosodo  
9:30-32**

(Mat. 17:22-23; Luk. 9:43b-45)

<sup>30</sup>Ai Yesus tia murid-muritna nomae'mo namarerei dodongoan iya'a ka' ningimputkon rae'anna i raaya'a, lumiu na lipu'na Galilea. Ai Yesus sian mo'uus inti'ionna mian se' damo aana i ia, <sup>31</sup>gause i ia kae-kae' mimisiso' murid-muritna taena, "Yaku', Anak Manusia, bo rookonna mian kada' papateion, kasee bo tuo' soosodo na ilio kotolu'na."

<sup>32</sup>Murid-murid ni Yesus sianta ninginti'i upa men ia pisiso'kon i Yesus, kasee i raaya'a matakut mimikirawar na Ko'ona.

**Ai ime a men balaki'na na  
karansala'anna murid  
9:33-37**

(Mat. 18:1-5; Luk. 9:46-48)

<sup>33</sup>Ari Yesus notakamo na Kaper-naum. Ndo'omo na laigan ia pikirawarimo i Yesus a murid-muritna, taena, "Upa a men poogagaikononmuu umba'a na tanga'na salan?"

<sup>34</sup>Raaya'a sianta ninsimbati gause na tanga'na salan i raaya'a mompoo-gagaikon se' ime a men balaki'na tuu' i raaya'a. <sup>35</sup>Ai Yesus no'umoruang, kasi ia leelo' a muridna sompu-sompulo' rua' irana iya'a. Ai Yesus norobu na ko'ona i raaya'a, taena, "Ime i kuu men mingkiri' bi sida balaki'na, tiadaa sida koi morio'na, po'ata'onna mian biai'." <sup>36</sup>Noko daa iya'a, ia ala i

Yesus a anak itiu' sa'angu' kasi ia pokerer na tanga'na i raaya'a wiwi'na. Kasi ia taawan i Yesus a anak iya'a, ka' norobu na murid-muritna, taena, <sup>37</sup>Mian men mongkologu'kon ka' mangawawau pore na sa'angu' anak koi kani'i gause mian iya'a mongololo' pisiso'ku, nono' a men ngaanon mongkologu'kon i yaku'. Ka' mian men mongkologu'kon i yaku', ia taasi' tongko' mongkologu'kon i yaku', kasee mongkologu'kon uga' i ia men nomosuu' i yaku'."

9:34: Luk. 22:24

9:35: Mat. 20:26-27, 23:11, Mrk. 10:43-44, Luk. 22:26

9:37: Mat. 10:40, Luk. 10:16, Yoh. 13:20

**Sa'angu' mian men taasi' murid ni  
Yesus numbuse'i meena tia ngaan  
ni Yesus  
9:38-41**

(Luk. 9:49-50)

<sup>38</sup>Kasi i Yohanes nobatundun ni Yesus, taena, "Guru, kai nimiile' sa'angu' mian numbuse'i meena see tia ngaanmuu a numbuse'ina, mbaka' kai kokundakonmo i ia gause i ia taasi' tii kita."

<sup>39</sup>Kasee i Yesus norobu, taena, "Alia i kuu mongkokundakon i ia, gause sianta sa'angu' mian a men mangawawau upa kosamba' tia ngaanku uga' liuliu sida mingidek i yaku'. <sup>40</sup>Mian men sianta malawan na ko'onta, nono' tii kita. <sup>41</sup>Inau' pore-pore. Mian men mimi'numi i kuu, montoodaa i kuu lolo'na Kristus, ia sabole-bole mantausi tambona."

9:40: Mat. 12:30, Luk. 11:23

9:41: Mat. 10:42

Yesus noki' anui giigii' upa men  
mondosai

9:42-50

(Mat. 18:6-9; Luk. 17:1-2)

<sup>42</sup>"Ime a men bo manggau'kon anak morio' karaani'i sa'asa'angu'ipo kada' sianmo mamarasaya i yaku', mbulo mian inono' nikooti watu kilangan\* na toure'na ka' nituonng na lalomna tobui dako' mangawawau koiya'a na anak morio' ka' kana' ukumanna Alaata'ala. <sup>43</sup>Too se' limaam a mondosai i koo, kolongi a limaam inono', gause mau rua-ruambotakna limaam isian, see i koo minsoop na apuna naaraka men sidutu, mbulo tia lima sambotak, see i koo tumuo' tia Alaata'ala. [<sup>44</sup>Apuna naaraka iya'a sianta pate ka' ule morio' uga' sianta pate na apu iya'a.] <sup>45</sup>Too se' saraat a mondosai i koo, kolongi a saraat inono', gause mau saratan i koo rua-ruambotakna, kasee i koo balo'konon na naaraka, mbulo tia sarat sambotak see i koo tumuo' tia Alaata'ala. [<sup>46</sup>Apuna naaraka iya'a sianta pate ka' ule morio' uga' sianta pate na apu iya'a.] <sup>47</sup>Too se' mataam mondosai i koo, kuati a mata inono', gause mau mataan i koo rua-ruambotakna, see i koo balo'konon na naaraka, mbulo tia mata sa'angu' see i koo minsoop na Batumundo'-anna Alaata'ala. <sup>48</sup>Apuna naaraka iya'a sianta pate ka' ule morio' uga' sianta pate na apu iya'a.

<sup>49</sup>Wiwi'na mian bo molinasion tia apu, koikoimo upa men bo koyo'-konon bona Tumpu molinasion tia

timuson.

<sup>50</sup>Timuson mbase pore, kasee ka' natawas i ia, sianmo sidaon wawauon bi potee'. Mbaka' iya'a, i kuu tio bi sida koi timuson; tumuo' pooka'amat tia simbaya'muu."

9:43: Mat. 5:30 9:47: Mat. 5:29

9:48: Yes. 66:24

9:50: Mat. 5:13, Luk. 14:34-35

Yesus nimisiso'kon mangkana'i  
poorensaan

10:1-12

(Mat. 19:1-12; Luk. 16:18)

**10** Inda'a ai Yesus norumingkat mae' na libutan Yudea ka' na libutan na sambotakna weerkauna Yordan. Ka' indo'o uga' mian biai taka ningiriwuti i ia, ka' koi biasana ai ia taka mimisiso' i raaya'a uga'.

<sup>2</sup>Mbaka' notakamo a toropii mian Parisi bo monsobai i Yesus. Raaya'a bapikirawar na Ko'ona, taena i raaya'a, "Koi ukum na agamanta koi'upa ka' sa'angu' moro'one men boroki'an sida mengerensai boroki'na?"

<sup>3</sup>Kasee ia simbati i Yesus, taena, "Koi'upa a namarenta ni Musa na ko'omuu?"

<sup>4</sup>Taena i raaya'a, "Ai Musa nama-talai mian mengerensai boroki'na, asar muntulis surat cerai kutung."

<sup>5</sup>Taena i Yesus, "Ai Musa mbali' nuntulis parenta iya'a na ko'omuu gause i kuu kosian mingkira' pisi-so'on. <sup>6</sup>Kasee na tumbe-tumbepo, tempona Alaata'ala nangawawau manusia, 'Alaata'ala nangawawau moro'one tia wiwine. <sup>7</sup>Mbali' iya'a

9:42 watu kllangan: watu malempat balaki' ka' marawat men pakeonna mian mbaripi minggiling gandum men kakariorkononna sapi' a pulu'na.

9:44, 46, 48 ule morio': ule men mangkaan upa baras.

moro'one bo mamarerei sinana tia tamana ka' mosa'angu' tia boro-ki'na. <sup>8</sup>Mbaka' i raaya'a taasi'mo rua' mian, kasee sa'angu" <sup>9</sup>Mbali' iya'a upa men ia posa'angu'mo Alaata'ala sian sida rensaonna manusia."

<sup>10</sup>Tongko' na lalomnamo laigan, murit-murit ni Yesus nobapikarawarmo soosodo upa men ia poosimbatkon toropii mian Parisi tii Yesus koi umba'a. <sup>11</sup>Mbaka' ia bantil i Yesus na ko'ona i raaya'a taena, "Ime-ime a mengerensai boroki'na ka' mosuo' tia wiwine sanggiran, ai ia kanono' bersina. <sup>12</sup>Mau uga' wiwine men mengerensai langkai'na ka' mosuo' tia moro'one sanggiran, ia uga' bersina."

10:4: Ul. 24:1-4, Mat. 5:31 10:6: Kej. 1:27, 5:2 10:7-8: Kej. 2:24 10:11-12: Mat. 5:32, 1Kor. 7:10-11

### Yesus nambarakaati anak morio' 10:13-16

(Mat. 19:13-15; Luk. 18:15-17)

<sup>13</sup>Isian mian nangawawa anakna i raaya'a mbaale'e ni Yesus kada' daa i Yesus mongkoyong ka' mambara-kaati anakna i raaya'a. Kasee murit ni Yesus tongko' nongkomaso'i i raaya'a. <sup>14</sup>Kasee ia piile' i Yesus se' koiya'a, ia pinsala'imo, taena, "Patalai a anak karaanono' taka na ingku! Amo' kokundakonon i raaya'a le'emari na ingku', gause mian men koi kanono' i raaya'a mba'a men boo sida mianna Alaata'ala. <sup>15</sup>Intoomkon ini'imari! Ime a men taka na Alaata'ala sianta koi anak itiu',<sup>\*</sup> ai ia sianta sida bo mianna Alaata'ala." <sup>16</sup>Noko daa i ia nangaan koiya'a, ai Yesus nongorootmo anak-anak

morio', kasi ia nda'anakon a limana na wawona takala'na anak-anak morio' iya'a ka' ia barakaati.

10:15: Mat. 18:3

### Mian kaya nimikirawar ni Yesus upa men tio wawauonna kada' ia sida mantausi kotuo'an men sidutu 10:17-31

(Mat. 19:16-30; Luk. 18:18-30)

<sup>17</sup>Temponamo i Yesus rumingkat ningimputkon rae'anna taka a sa'angu mian tende-tende' mbaale'e ni Yesus kasi no'umoruang dukuduku tuur na arop ni Yesus. Ai ia nobapikirawarmo, taena, "Guru men pore, upa a men tiodaa wawauonku kada' i yaku' mantausi kotuo'an men sidutu?"

<sup>18</sup>Ia simbati i Yesus, taena, "Nongko'upa se' i koo mangaan i yaku' se' pore? Sianta sa'angu' mian men pore saliwana Alaata'ala. <sup>19</sup>Ai koo ninginti'imo aturna Alaata'ala: 'Alia mampapatei mian, alia bersina, alia mamangan, alia mimbo-rekon mian, alia mangakali mian, ka' angga'i a tamaam tia sinaam."

<sup>20</sup>Taena mian iya'a, "Guru, wiwi'na atur iya'a yaku' pokolo-loikonmo temponapo i yaku' dauga' laandue'."

<sup>21</sup>Yesus nintioki mian iya'a ka' nolingu' tuu, kasi i ia norubu, taena, "Dauga' sangkaliangan a men koo'po koo wawau. Rae' ka' balukon a giigii upaam ka' rookon a doi'na bo ko'ona mian talalais, kada' i koo mokosue kupang na surugaa. Moko daa kasi i koo taka mongololo' i

10:15 kol anak itiu': montombonoi noa men parasaya tuu'.

yaku'." <sup>22</sup>Nongorongor i Yesus nangaan koiya'a, mian iya'a liuliu kinobollian a dudusna. Ia nomae'-mo kasee susa tuu' a noana gause i ia kaya tuu'.

<sup>23</sup>Kasi i Yesus nengelealokon murit-muritna ka' nambantilkon na ko'ona i raaya'a, taena, "Marepa tuu' a mian kaya minsoop bo sida mian men tomundo'ionna Alaata'ala."

<sup>24</sup>Murit-murit ni Yesus samba' tuu' nongorongor upa men ia tundun i Yesus. Kasee ia imputi i Yesus soosodo a wurungna, taena, "Anak-anakku, marepa' tuu' mba'a minsoop kada' sida mian men tomundo'ionna Alaata'ala. <sup>25</sup>Bagiakon sa'angu unta mimbolo'i bolo'na pakaut a daana, ka' tia sa'angu' mian kaya minsoop na lalomna men tomundo'ionna Alaata'ala."

<sup>26</sup>Murit ni Yesus kaekae' samba' tuu'namo, ka' i raaya'a bisara sa'angu-sa'angu' waale'e, taena, "Ka' koiya'a, ai ime ansee a men daa boo salamatkonon?"

<sup>27</sup>Yesus nengelealokon i raaya'a soosodo kasi taena, "Koi manusia hal iya'a sianta minsoop na akal kada' mian daa sida salamatkonon, kasee minsoop na akal kalu na Alaata'ala. Gause' wiwi'na minsoop na akal kalu na Alaata'ala."

<sup>28</sup>Kasi tae ni Petrus, "Piile', i kai namarereimo wiwi'na upamai kada' mongololo' i kuu."

<sup>29</sup>Ia simbati i Yesus, taena, "Parasaya ini'imari, mian men mamare-reimo laiganna, kabai utusna moro'one, kabai utusna wiwine, kabai sinana, kabai tamana, kabai anakna, kabai se' ale'na gause mongololo' i yaku' ka' gause

mengelelekon iele pore na Alaata'ala, <sup>30</sup>mian kanono' koini'i uga' boo mantarima soosodo koi piri-sa'atu paku' laigan, utus moro'one, utus wiwine, sina, anak tia ale' mau mune' lolo-lolo' biai' a repaan men boo liuon. Ka' ini'imari mian konono' boo mantarima kotuo'an sidutu. <sup>31</sup>Gause biai' a mian men penting tempo koini'i boo kosian penting tempo ini'imari. Ka' uga' mian men tempo koini'i piile'onta sianta penting, boo penting tempo ini'imari."

10:19: Kel. 20:12-16, Ul. 5:16-20  
10:31: Mat. 20:16, Luk. 13:30

### Kopiritolunamo i Yesus nambantilkon bo pateanna 10:32-34

(Mat. 20:17-19; Luk. 18:31-34)

<sup>32</sup>Yesus tia murit-muritna na lalomna sa'angu' rae'an mae' na Yerusalem, ka' i Yesus na olukonna i raaya'a. Murit-muritna samba' ka' matakut. Mau mian men mongololo' i ia indoro'omari na komburi' uga' matakut. Ia leelo'mo a som-pulo' rua' muritna ka' ia nuntum-beimo nambantilkon soosodo na ko'ona i raaya'a upa men bo rumpakionna. <sup>33</sup>Taena, "Koini'i kita mae' na Yerusalem ka' Anakna Manusia boo rookonon na imam-imam moola' tia wawa ukum Torat. Ka' i raaya'a boo mungukum i ia tia ukuman pate. Ka' uga' i raaya'a boo mongorookon i ia na limana mian men taasi'po samba Yahudi men kosian mamarasaya Alaata'ala. <sup>34</sup>Ka' i ia boo ide-idekion, ka' inorion, sasalion ka salipkonon. Ka' moko daa iya'a, kotolu'na ilio ai ia boo tue' soosodo."

**Pa'ase' ni Yakobus tii Yohanes****10:35-45**

(Mat. 20:20-28)

<sup>35</sup>Noko daa iya'a ai Yakobus tii Yohanes, anak ni Zebedeus, nun-tuu'i i Yesus ka' nobantil, taena, "Guru, kai mongooskon kada' i kuu mangalabot pore pa'ase'mai."

<sup>36</sup>Ia simbati i Yesus i raaya'a, taena, "Upa a po'uusmuu men wawauonku?"

<sup>37</sup>Taena i raaya'a, "Too daa sida, tarai i kai umoruang na lalomna batomundo'anmuu ini'imari. Ka' kansala'anna sa'angu' mian umoruang na uananmuu, sa'angu' mian na kauri'muu."

<sup>38</sup>Kasee ia simbati i Yesus, taena, "Kuu sianta minginti'i upa men pa'ase'onmuu. Se' daa pokoonmuu a minginum na inuman repaan men tiodaa boo inumonku ka' minsoop na sa'angu' repaan men boo rumpakionku?"

<sup>39</sup>"Pokoonmai" taena i raaya'a.

Mbaka' i Yesus norobumo soosodo na ko'ona i raaya'a taena, "Daa mba'a. Kuu boo minginum na inuman repaan men boo inumonku, ka' minsoop na lalomna sa'angu' repaan men boo rumpakionku. <sup>40</sup>Kasee ime a men boo umoruang na uananku kabai na kauri'ku, taasi' i yaku' a men mantantukon. Alaata'ala a men mantantukon ime-ime a men boo umoruang na oruangan iya'a."

<sup>41</sup>Nongorongor se' koiya'a, som-pulo' murit ni Yesus nongkomaso'konmo i Yakobus tii Yohanes.

<sup>42</sup>Kasee i Yesus nengeleelo'mo i raaya'a ka' nambantili, taena, "Koi men kuu inti'i, raaya'a men ngaa-nion pamarentana mian men taasi'po samba Yahudi men kosian mamarasaya Alaata'ala mamarenta mianna tia noa men mapanas. Ka' moomoola'na uga' mansalankon parentana men koiya'a ka' memmeet mianna. <sup>43</sup>Kasee i kuu amo' koiya'a. Ka' ime i kuu men mingkira' sida mian moola', ai ia tiodaa sida pelayanmuu, <sup>44</sup>Ka' ime i kuu kani'i men mingkira' sida mian penting, ai ia tiodaa sida ata' bona mian sanggiran. <sup>45</sup>Gause Anakna Manusia taasi' taka bo layanion. Ia taka bo mangalayani ka' bo mongorookon noana tia wakana bo pontolosi dosana mian biai'."

10:38: Luk. 12:50 10:42-43: Luk. 22:25-26  
10:43-44: Mat. 23:11, Mrk. 9:35, Luk. 22:26

**Yesus nengelesi'i i Bartimeus****10:46-52**

(Mat. 20:29-34; Luk. 18:35-43)

<sup>46</sup>Notakamo i Yesus tia muritna na Yerikho. Tempona i Yesus tia muritna ka' mian biai' namarerei kota iya'a, isian sa'angu' mian talalais men mampisok oru-oruang na soripi'na salan ka' mo'ase'-ase' upana mian men lumiu. Ngaanna ai Bartimeus, anak ni Timeus. <sup>47</sup>Sarataa ia rongor se' i Yesusmo men samba Nasaret a nolumiu, ia nangkakaro'mo nengeleelo' i Yesus taena, "Yesus, lee' ni Daud!# Tulung i yaku, alinta!"

<sup>48</sup>Mian iya'a ia komaso'imo mian

10:47 lee' ni Daud: Ai Bartimeus nengeleelo' i Yesus se' lee' ni Daud gause ia inti'imo se' isian i Mesias men boo taka na lee' ni Daud.

biai', ka' niposuu' mimporokot. Kasee ia tongko' kaekae' momboolaki mangkakaró', taena, "Lee' ni Daud, tulung alinta i yaku!"

<sup>49</sup>Ai Yesus notaanmo kasi taena, "Leelo' i ia."

Mbaka ia leelo'mo i raaya'a a mian mampisok iya'a. Kasi taena i raaya'a, "Popotaan a noaam! Mai ringkat. Ai koo ia leelo' i Yesus."

<sup>50</sup>Mian mampisok iya'a liuliu nungukati bokukum dubana ka' nambalo'kon, kasi norumingkat donga-dongan ka' nombaa'e ni Yesus.

<sup>51</sup>Yesus nimikirawar, taena, "Upa a men ko'uuwus wawauonku na ko'oom?"

Ia simbat i mian mampisok iya'a, taena, "Guru, yaku' mingkira' mimiile'."

<sup>52</sup>Kasi ia simbat i Yesus soosodo, taena, "Rae'mo ansee' i koo. Kaparasaya'aan a nengelesi'i i koo!" Mian mampisok iya'a liuliu nopooiile'. Kasi ai ia nongololo' i Yesus na rae'anna.

### Yesus nilaboti tia adat na Yerusalem

11:1-11

(Mat. 21:1-11; Luk. 19:28-40; Yoh. 12:12-19)

**11** Sarataa i Yesus tia muritna montorumpakimo Yerusalem, karani'mo Betfage tia Betania men na Bukit Zaitun, ai Yesus nomosuu'mo rua' mian muritna. <sup>2</sup>Ka' ia posuu' a muritna, taena, "Rae' na kampung katu'u men torumpakionta. Taka intu'u kodi' i kuu boo mungurumpaki sa'angu'



*Kota Betanian*

keledai morio' nitoongkon, men sianpo ia toolakiti mian. Ala ka' kakai a kokootna ka' wawa tu'umari. <sup>3</sup>Ka' too isian mian mimi-kirawar na ko'omuu, 'Nongko'upa i kuu se' mangkakai kokootna keledai kanono?', bantilkon inta, 'Tumpu mamaraluui. Ka' sian maalin daa ule'kononamo i ita.'"

<sup>4</sup>Raaya'a nomae'mo ka' raaya'a nungurumpaki keledai morio' nitoongkon na aropna laigan na soripi'na salan kasi ia kakai i raaya'a. <sup>5</sup>Isian toropii mian indo'o potokerer nimikirawar na ko'ona i raaya'a, taena i raaya'a, "Hee, nongko'upa i kuu se' mangkakai kokootna keledai kanono'?"

<sup>6</sup>Kasi ia simbati i raaya'a koi men ia potookon i Yesus. Uga' ia patalaimo mian. <sup>7</sup>Kasi i raaya'a nangawawa keledai iya'a mbaatu'u ni Yesus. Taka intu'u ia latasimo a sengke'na keledai iya'a tia dubana i raaya'a, kasi ia lakiti i Yesus. <sup>8</sup>Biai' a mian men nungukati bokukum dubana i raaya'a ka' nanggampalkon na salan, ka' isian mian men nangala' panga' morio' men roonanaan na ale' ka' nomokela na salan. <sup>9</sup>Giigii' mian men potora'e', mau men na olukon ka' men indoro'omari na komburi', mangkakarokon, taena i raaya'a, <sup>10</sup>"Hosana, tunde' a Alaata'ala! Bi kobara-kaatian i ia men taka mangawawa ngaanna Tumpu, ka' bi kobara-kaatian a Batomundo'anna ini'imari men batomundo'an ni Daud minti'-inta. Tunde' a Alaata'ala na ko'-

alayo'an tuu'."

<sup>11</sup>Taka na Yerusalem i Yesus ninsoopmo na Laiganna Alaata'ala. Na Laiganna Alaata'ala iya'a ia paresa wiwi'na waale'e ka' nilealokon. Kasee, gause boomo malom, ia nomae'mo na Betania tia sompulo' rua' muritna.

11:9: Mzm. 118:25-26

Yesus nantadeankon kau ara kada' bi pate.

11:12-14

(Mat. 21:18-19)

<sup>12</sup>Koi liilana, tempona i Yesus tia sompulo' rua' muritna namarereimo Betania, Yesus nopoosurimo nolo-lu'. <sup>13</sup>Na oloapo ia nontoa'i kau ara koi kantu'u, marioompong tuu' a roonanna. Ia rae'imo a kau ara iya'a toodaa woo'an. Taka intu'u ia kosian nungurumpaki woo'na, kasee tongko' roonanna a biai', gause sianpo tempona kau ara miwoo'. <sup>14</sup>Mbaka' tae ni Yesus, "Mulai koi-ni'i sianmo sa'a-sa'angu'ipo mian mangkaan woo'om pataka manau'."

Giigii' muritna nongorongor.

Yesus numbuse'i mian men mobaluk na Laiganna Alaata'ala  
11:15-19

(Mat. 21:12-17; Luk. 19:45-48; Yoh. 2:13-22)

<sup>15</sup>Kasi taka a ari Yesus na Yerusalem. Tongko' ninsoop i Yesus na Laiganna Alaata'ala, ia numbuse'imo mian biai' men mobaluk indo'o na tolodona Laiganna Alaata'ala.\* Ia pasu-pasuale' a

11:15 tolodona Laiganna Alaata'ala: Tolodo iya'a bo basambayanganna mian men taasi' Yahudi. Kasee ia pakemo i raaya'a bo pobalukanna.

mejana pontolosian doi<sup>#</sup> ka' bangko-bangko na mian pobaluk sapu' marampatii ia pasu-pasuale'---ka' nikaarkon. <sup>16</sup>Ka' ia sianmo namatai pobaluk lumiu mangawawa upa-upa na tolodona Laiganna Alaata'ala. <sup>17</sup>Kasi i Yesus nimisiso' ka' nambantili i raaya'a, taena, "Taasi' nipokotulismo na kitapna wurungna Alaata'ala, 'Laiganku mbase bo sida basambayanganna mian longkop tano'? Kasee tongko' wawauonmuu bo tempat batualo'-anmuu."

<sup>18</sup>Sarataa imam moola' tia wawa ukum Torat nongorongor upa men wawauon ni Yesus, raaya'a nansarakmo akal kada' mampapatei i Yesus. Raaya'a uga' matakutkon i Yesus gause biai' a mian men koporean upa men pisiso'konon ni Yesus.

<sup>19</sup>Guntumalommo ai Yesus tia muritna namarereimo kota iya'a.  
11:17: Yes. 56:7, Yer. 7:11

**Pisiso' ni Yesus mangkana'i kau ara  
men nokangkungmo  
11:20-26  
(Mat. 21:20-22)**

<sup>20</sup>Ma'ulopna, tempo i raaya'a nolumiu, ia piile' a kau ara iya'a se' nokangkungmo ti waka-wakatna. <sup>21</sup>Mbaka' notonginau'mo i Petrus upa men ia ngaan i Yesus koi rimberi'na. Nobapikirawarmo i ia, taena, "Guru, soba piile'! Kau ara men kuu komaso'i imberi', nokangkungmo."

<sup>22</sup>Ia simbati i Yesus, taena,

"Parasayamo na Alaata'ala. <sup>23</sup>Yaku' mambantilkon na ko'omuu men tuutuu'anna. Ime-ime a momosuu' buu'na kani'i, taena, 'Bi ko'akit ka' bi tombalo' i koo na tobui,' asar noana amo' raranga' ka' parasaya na upa men ngaanonna sabole boo sida, mbaka' wawau iya'a boo sida na ko'ona. <sup>24</sup>Mbali' iya'a upa a men pa'ase'onmuu na lalomna sambayangmuu, parasaya inono' gause Alaata'ala noko pantaraimo upa men kuu pa'ase', mbaka' i kuu boo mantarima. <sup>25</sup>Ka' i kuu sambayang, kasee noamuu kosian sanaang na mian gause i ia nampapolosi noamuu, ampuni kutung a mian iya'a, kada' Tamamuu men na surugaa mangampuni i kuu." [ <sup>26</sup>Kalu i kuu sianta mangampuni mian sanggiran, mbaka' Tamamuu men na surugaa sianta mangampuni i kuu.]

11:23: Mat. 17:20, 1Kor. 13:2  
11:25-26: Mat. 6:14-15

**Pingi-pinginti'ina mian Yahudi  
bapikirawar men mangkana'i kuasa  
ni Yesus  
11:27-33  
(Mat. 21:23-27; Luk. 20:1-8)**

<sup>27</sup>Ai Yesus tia muritna taka soosodo na Yerusalem. Rae-rae' i Yesus na tolodona Laiganna Alaata'ala taka a toropii imam moola', wawa ukum Torat ka' motu-motu'a nantaankon i ia. <sup>28</sup>Raaya'a nimikirawar, taena, "Kuasa aana a men koo pake? Ka' ai ime a nantarai i koo kuasa mbali' nangawawau upa

11:15 pontolosian dol': Giigii' mian men taka na Yerusalem men taasi'po samba Yahudi see basambayang na Laiganna Alaata'ala tiadaa mombolosi doi'na i raaya'a kada' sida pakeon bo pambayar pajak na Laiganna Alaata'ala ka' bo pingili kurubaan.




men koi na rimberi'na?"

<sup>29</sup>Ia simbat i Yesus, taena, "Yaku' uga isian upa bo pikira-wareonku na ko'omuu. Ala ka' simbati kada' bantilkononku i kuu se' tia kuasa upa mbali' daa i yaku' mangawawau koiya'a. <sup>30</sup>Alaata'ala kabai manusia a nantarai i Yohanes kuasa boo mansarani mian?"

<sup>31</sup>Imam-imam moola' ka' motu-motu'a na Yahudi nopootunduniimo raaraaya'ana, taena i raaya'a, "Kalu bantilkononta, 'Tia haakna Alaata'ala,' tantu simbationna, 'Nongko'upa i kuu se' kosian mamarasaya upa men tae ni Yohanes?' <sup>32</sup>Kasee mare-marepanapo kalu simbationta, 'Tia haakna manusia.'" Ka' i raaya'a matakutkon mian biai', gause wiwi'na mian ninginti'imo se' i Yohanes sa'angu' nabii. <sup>33</sup>Mbaka' ia simbati i raaya'a, "Kai sianta ninginti'."

Ia simbati i Yesus i raaya'a soosodo, taena, "Kalu koiya'a, yaku' uga' sianta mambantilkon na ko'omuu se' tia kuasa ka' haak ni ime' i yaku' mangawawau koiya'a."



*Langkeang men pandagaian ale'na  
anggur*

**Yesus mompopopialakon  
mangkana'i men pingilimang ale'na  
anggur.**

**12:1-12**

(Mat. 21:33-46; Luk. 20:9-19)

**12** Ai Yesus nuntumbeimo nuntundun popiala na imam moola', wawa ukum Torat tia moomoola'na Yahudi. Yesus batundun, taena, "Isian sa'angu' mian nosu-mapar bo ale'na anggur, kasi ia bala a tiku-tikum ale'na iya'a kada' sianta upa minsinga. Noko daa ia nengkekemo bolo' kada' bo pangalandakan anggur iya'a. Ka' i ia uga' nomokerer sa'angu' langkeang. Noko daa iya'a ia nantamboimo toropii mian bo pingilimang ale' iya'a. Kasi tombono ale' iya'a nomae'mo na tano'na mian. <sup>2</sup>Sarataa temponamo kopumpupuan anggur, mian iya'a nomosuu'mo sa'angu' ana-anakna mae' na mian men mingilimang ale'na anggur iya'a kada' mangala obosna. <sup>3</sup>Kasee pingilimang-pingilimang ale'na anggur iya'a tongko' nangarakop ana-anakna tombono ale' anggur iya'a ka' nomool ka' nomosuu' nomae', kasee kosian nitarai obosna. <sup>4</sup>Noko daa koiya'a, tombono ale' anggur iya'a nomosuu'mo sa'angu' ana-anakna men sanggiran mbaatu'u na ko'ona i raaya'a. Mian iya'a ia pukul i raaya'a pataka nobelaon a takala'na ka' ningaani tia ni'uduli. <sup>5</sup>Tombono ale' anggur iya'a nomosuu'mo sa'angu' mian soosodo ana-anakna, ka' mian iya'a ia papatei i raaya'a. Biai' uga' a ana-anak sanggiran men niposuu'. Isian men nipool ka' isian uga' men nipapatei. <sup>6</sup>Koini'i somo sa'a-sa'angu'

anakna men kolinu'na tuu'. Kokomburi'anna ia nomosuu'mo anakna, taena, 'Kalu anakku sabole katakutna i raaya'a.' <sup>7</sup>Tongko' ia piile' pingilimang-pingilimang ale'na anggur iya'a se' notakamo a anak iya'a, raaya'a nobatundunmo waale'e sa'angu'-sa'angu', taena i raaya'a, 'Ni'imo i ia mbaa men bo pontombonoi ale' kalu pate a tamana. Kita papateia i ia a daa, kada' ale' anggur iya'a bo ko'onta'mo.' <sup>8</sup>Mbaka' anak iya'a nirakopmo ka' nipapatei. Biibiina ia balo'kon i raaya'a na liwana ale'."

<sup>9</sup>Yesus nobapikirawar, taena, "Upamo a wawauonna tombono ale' anggur iya'a? Sabole i ia boo taka ka' mampapatei bi kabus a giigii' mian pingilimang ale'na. Kasi mongorookon ale'na iya'a na mian pingilimang sanggiran. <sup>10</sup>Saruingku i kuu nambasamo na Alkitaap, 'Watu men ia balo'konmo mian men tukang wawau laigan, olan se' watu iya'a men paraluukonon tuu' bo momokerer laigan. <sup>11</sup>Ni'i sa'angu' wawau na Tumpu men kosamba' ka' pore tuu'."

<sup>12</sup>Pingi-pinginti'i na Yahudi nansarak salan bo mangarokop i Yesus. Gause ia inti'i se' tundunan ni Yesus umba'a mompopopialakon i raaya, koi pingilimang ale' anggur men ba'idek. Kasee i raaya'a matakutkon mian biai. Mbaka' i raaya'a somo namarerei i Yesus.

**Mian Parisi tia mian ni Herodes  
bapikirawar ni Yesus mangkana'i  
mambayar pajak na Kaisar.**

**12:13-17**

(Mat. 22:15-22; Luk. 20:20-26)

<sup>13</sup>Pingi-pinginti'i na Yahudi nomosuu'mo mian Parisi tia toropii mian men na golongan ni Herodes# mae' waale'e ni Yesus mansarak mangakalkon i Yesus tia upa men pikirawaronna i raaya'a.# <sup>14</sup>Mian i raaya'a notakamo ni Yesus ka' nobapikirawar na ko'ona, taena, "Guru, kai inti'i i kuu kosian muntundun upa men kosian, ka' i kuu, mau i ime, kosian katakutmuu, gause i kuu kosian mingkira' kada' angga'ionna mian. Kasee i kuu mimisiso' tuutuu'na koi men posuu'na Alaata'ala. Kalu na aturanna agamanta, sida a mambayar pajak na Kaisar men tomundo' na Romawi, kabai sian? Tiodaa i kai mambayar pajak kabai sian?"

<sup>15</sup>Kasee i Yesus inti-inti'i akalna i raaya'a, kasi taena, "Nongko'upa i kuu se' monsobai i yaku'? Wawa le'emari a sa'angu' doi' perak kada' piile'onku." <sup>16</sup>Ia wawamo i raaya'a. Kasi i ia pikirawar taena, "Dudus ni ime' ka' ngaan ni ime' ini'i?"

Taena i raaya'a, "Dudus tia ngaan ni Kaisar."

<sup>17</sup>Kasi tae ni Yesus, "Ka' koiya'a mbaka' rookon na Kaisar a upa men

**12:13 mian men na golongan ni Herodes:** Samba Yahudi sanggiran men daa mingkira'kon kada' tongko' turunan ni Tomundo' Herodes Agung boo pontomundo'i i raaya'a.

**12:13 mansarak mangakalkon i Yesus tia upa men pikirawaronna i raaya'a:** Kalu simbation ni Yesus tiodaa mambayar pajak, mbaka' mian biai' men sian mo'uuskon i Yesus sida maso' mbaka' raaya'a bo mangarakop ka' mampapatei i Yesus. Kalu simbation ni Yesus sian sida mambayar pajak mbaka' pamarenta na Romawi iya'a men bo taka mangarakop ka' mampapatei i Yesus.

tiodaa bo rookonon na Kaisar. Ka' rookon na Alaata'ala a upa men tiodaa bo rookonon na Alaata'ala!"

Raaya'a samba' tuu' nongorongor upa men tae ni Yesus.

**Mian Saduki bapikirawar ni Yesus mangkana'i kotuo'an soosodo.**

**12:18-27**

(Mat. 22:23-33; Luk. 20:27-40)

<sup>18</sup>Toropii mian Saduki notaka ni Yesus. (Raaya'a kani'i sian mamarasaya kotuo'an soosodo.) Mbali' iya'a, raaya'a bapikirawar, taena, <sup>19</sup>"Guru, ai Musa nuntulis ukum koi kani'i bo ko'onta': Kalu sa'angu' mian moro'one pate kasee kosian anakon, mbaka' utusna tiodaa momosuo'i baluna kada' mantarai anak na mian kanono' men nopatemo. <sup>20</sup>Isian pitu' moro'one moto'utus. Men balaki'na nosuo' tia sa'angu' wiwine, ka' nopate a moro'one kasee sianta no'anakon. <sup>21</sup>Men korua'na nomosuo'imo wiwine iya'a, pate soosodo a langkai'na kasee sianta no'anakon. Koiya'a uga' na utusna men kotolu'na. <sup>22</sup>Koiya'amo uga' liuliu wiwi'na. Pitu-pitu'na nomosuo'i kasee kosian nantausi anak ka' nopate pitu-pitu'na. Ka' kokomburi'ianamo ya'amo wiwine a nopate. <sup>23</sup>Na ilio kotuo'an soosodo ini'imari, mian men moto'utus pitu' ira, ai ime a tombono boroki' iya'a?"

<sup>24</sup>Ia simbati i Yesus i raaya'a, taena, "Ai kuu mansala'imo tuu', gause i kuu sianta minginti'i Alkitaap ka' sianta minginti'i kuasana Alaata'ala. <sup>25</sup>Gause mian pate ka' tuo' soosodo, raaya'a

kosianmo dauga' mosuo' ka' poposuo'on. Kasee i raaya'a bo tuo' koi malaa'ikat na surugaa. <sup>26</sup>Ka' men mangkana'i koi mian pate see taraion kotuo'an soosodo. Kuu se' taasi' noko pambasamo wurung ini'i na kitap ni Musa? Kitap ni Musa se' mangaan isian kura' morio' men leap a apu, kasee i Musa mondo'o kere-kerer ka' isian wurungna Tumpu nambantilkon, taena, 'Yaku'mo a Alaata'ala ni Abraham, Alaata'ala ni Isak, ka' Alaata'ala ni Yakub.' <sup>27</sup>Alaata'ala iya'a taasi' Alaata'ala na mian pate. Kasee Alaata'ala na mian tuo'. Ai kuu uga' mansala'imo tuu'!"

12:19: Ul. 25:5 12:26: Kel. 3:6

**Yesus nambantilkon mangkana'i ukum men po'olukonon tuu'**  
**12:28-34**

(Mat. 22:34-40; Luk. 10:25-28)

<sup>28</sup>Isian sa'angu' wawa ukum Torat taka momorongori i Yesus poosimbat tia toropii mian Saduki, ka' i ia uga' minginti'i se' upa men simbatikonon ni Yesus na mian Saduki kana' tuu'. Wawa ukum Torat iya'a nobapikiwarar ni Yesus taena, "Wiwi'na ukum, ukum upa a men penting tuu'?"

<sup>29</sup>Tae ni Yesus, "Ukum men po'olukonon tuu' mbaka': 'Porongori i kuu samba Israel! Tumpu Alaata'alanta, mbaka' Tumpu men sianta isian sanggiran. Tongko' iya'a sa'angu'. <sup>30</sup>Kolingu'i a Tumpu Alaata'alamuu tia upa wiwi'na men isian na ko'omuu: tia noa molino men norumingkat na suloomuu, tia wiwi'na akalmuu ka' wiwi'na pikiranmuu ka' tia wiwi'na kakuatan-

muu.' <sup>31</sup>Ka' ukum men korua'na: 'Kolingu'i a simbaya'muu manusia koimo pongkolingu'imuu wakamuu suungmuu.' Sianta ukum men para-luukonon tuu' saliwana rurua' ukum kani'i."

<sup>32</sup>Kasi wawa ukum Torat iya'a ninsimbat i Yesus taena, "Tuutuu', Guru! Kana'mo inooro'o taemuu. Tumpu Alaata'ala uga' tongko' sa'angu' ka' kosian Alaata'ala sanggiran. <sup>33</sup>Ka' manusia tiodaa mongkolingu'i Alaata'ala tia upa wiwi'na men isian na ko'ona: noa malino men norumingkat na suloo, tia wiwi'na akal ka' wiwi'na pikiran ka' tia wiwi'na kakuatanna. Ka' i ia uga' tiodaa mongkolingu'i simbaya'na manusia koi pongkolingu'ina wakana suungna. Ya'a a daana, tia mongorookon kurubaan men tunuon ka' kurubaan sanggiran bona Alaata'ala."

<sup>34</sup>Ia porongor i Yesus a simbatna wawa ukum Torat iya'a se' pore' ka' kana'. Ia nobisaramo, taena, "Ai koo kara-karaani'mo sida mian men tomundo'ionna Alaata'ala." Noko daa iya'a sianmo isian mian men dauga' barani bapikirawar soosodo ni Yesus.

12:29-30: Ul. 6:4-5 12:31: Im. 19:18  
12:32: Ul. 4:35 12:33: Hos. 6:6

**Yesus nambantilkon se' ai Mesias taasi'po tongko' lee' ni Daud, kasee uga' Tumpu ni Daud.**

**12:35-37**

(Mat. 22:41-46; Luk. 20:41-44)

<sup>35</sup>Kackae' mimisiso' i Yesus na

Laiganna Alaata'ala, i Yesus noba-pikirawarmo soosodo na ko'ona i raaya'a, taena, "Koi'upa a wawa ukum Torat nambantilkon se' Mesias lee' ni Daud? <sup>36</sup>Ai Daudpo suungna, gause kuasana Alus Molinasna Tumpu Alaata'ala nangaan: 'Alaata'ala norobu na Tumpungku: oruang na uananku\* pataka musumu ndoaale'ekononku na palaana saratmuu.' <sup>37</sup>Ai Daudpo suungna mangaan i ia Tumpuna. Koi'upa a kosidana se' daa i ia bo anakna?"

Mian biai' sanaang tuu' nongorongor i ia mimisiso'.

12:36: Mzm. 110:1

**Yesus nompopo'ingat kada' pore-pore na wawa ukum Torat**

**12:38-40**

(Mat. 23:1-36; Luk. 20:45-47)

<sup>38</sup>Tae ni Yesus soosodo, "Pore-pore tia wawa ukum Torat dako' akalionna. Gause i raaya'a mo'uus tuu sumasayo na pasar mamake bokukum duba ka' mintipiile' se' yaku' ini'imari daa mian penting ka' daa mansanaangi Alaata'ala, ka' mingkira' tuu' angga'ionna mian. <sup>39</sup>Raaya'a uga' mo'uus tuu' umoruang na muka tuu' na laigan ba'ibadatan kabai na pootatakaianna mian biai'. <sup>40</sup>Raaya'a mangakali balu ka' mangala laiganna. Ka' bo pingililungina gau'na men ba'idek, raaya'a sambayang alayo-alayo'. Mian koi ya'a sabole' boo mantausi ukuman marawat."

12:36 oruang na uananku: Kani'i adatna Yahudi, men balaki' a kuasana ka' angga'ion men sida umoruang na uanan.

**Pisiso' ni Yesus mangkana'i  
persembahan na sa'angu' balu men  
talalais.**

**12:41-44**

(Luk. 21:1-4)

<sup>41</sup>I Yesus no'umoruang nangarop peti pingilinsonan doi' persembahan na laiganna Alaata'ala. Yesus mamakanasai mian biai' monsoopkon doi'na i raaya'a na lalomna peti. Biai' a mian kaya mingilinson doi'na men biai' a angga'na. <sup>42</sup>Taka a sa'angu' balu men talalais ningilinson rua' doi' logamna men tongko' titiu' a angga'na. <sup>43</sup>Ia leelo'mo i Yesus a muritna, taena, "Piile' ini'i. Balu men talalais a biai'na ia linson na lalomna peti tia na mian sanggiran. <sup>44</sup>Gause i raaya'a mantarai tia labina doi'na. Kasee balu men talalais kale'e, nongorookonmo upa wiwi'na men somo iya'a a isian na ko'ona, ka' men bookoi bo kaanonna liila ipuan."

**Yesus mambantilkon boo  
koruntunanna laiganna Tumpu  
Alaata'ala.**

**13:1-2**

(Mat. 24:1-2; Luk. 21:5-6)

**13** Tempona i Yesus no'umuar na laiganna Alaata'ala, sa'angu' muritna nangaan, taena, "Guru, piile'! Pore tuu' a laigan watu balaki' kale'e ka' moonggor tuu'." <sup>2</sup>Tae ni Yesus, "Yaku' mingkira' mambantilkon na ko'omuu mangkana'i laigan watu balaki' men taemuu se' balaki' ka' moonggor. Sianta sa'a-sa'angu'ipo watu na laiganna Alaata'ala

kani'i a men dauga' patalaion pootapi. Wiwi'na boo1 runtunion."

**Yesus batundun mangkana'i repaan  
men boo liuon kalu boomo  
komburi'na saman.**

**13:3-13**

(Mat. 24:3-14; Luk. 21:7-19)

<sup>3</sup>Noko daa iya'a ari Yesus nomae'mo na buu'na Zaitun ka' i Yesus no'umoruang<sup>#</sup> nangarop patuk buu'na men kekelaanna laiganna Alaata'ala. <sup>4</sup>Ai Petrus, Yakobus, Yohanes ka' ai Andreas bapikirawar raaraaya'ana ni Yesus, taena i raaya'a, "Bantilkon i kai se' ipimo a tempo men boo koruntunanna laiganna Alaata'ala, ka' koi'upa a pinginti'ian kalu takamo a tempona."

<sup>5</sup>"Ba'ingat pore-pore," tae ni Yesus, "Dako' ko'akalian i kuu. <sup>6</sup>Biai' a mian boo taka umala paala, ka' mambantil 'Se' yaku'mo mba'a i Mesias' ka' i raaya'a boo mambalubalu' mian biai'. <sup>7</sup>Ka' isian mian mambantilkon na ko'omuu se' isian mian pootumburi, kabai i kuu mongorongor laungna panaapi, kabai mongorongor lele'na mian pootumburi, alia' matakut. Gause iya'a tiodaa bi sida koiya'a ka' koo'po kokiamatan. <sup>8</sup>Gause lipu' boo pootumburi tia lipu'. Ka' boo sida lili'on moola' na toropii negara, ka' boo liuonna kololuan. Wiwi'na iya'a baasi muntumbei repaan, koimo polos men surionna wiwine men booboomo mondodongokon anak.

<sup>9</sup>I kuu tiodaa ba'ingat pore-pore, gause i kuu boo rakopon ka'

13:3 no'umoruang: Tempo iya'a adatna Yahudi umoruang kalu mimisiso' mian.

wawaon na pingi-pinginti'i laigan ba'ibadatan. Kuu boo poolon na laigan ba'ibadatan. Ka' i kuu uga' boo wawaon na aropna mian moola' ka' na tomundo' gause i kuu parasaya na ingku'. Ya'amo a tempomuu men pore bo pambantikonanmuu lele' pore na ko'ona i raaya'a. <sup>10</sup>Lele' pore men na Alaata'ala todaa lelekonon kutung olukonanpo na sanda' lipu'. <sup>11</sup>Kalu rakopon i kuu ka' wawaon na pengadilan, mbaka' amo' matakut na upa men boo porobukononmuu gause upa men porobukononmuu kanono' taa-si' rumingkat na ko'omuu kasee na Alus Molinasna Alaata'ala. <sup>12</sup>Isian uga' mian boo mingidek ka' minsasapukon utusna suungna kada' bo minsidakon utusna papateionna mian. Isian uga' tama boo mingidek ngaanna anakna ka' misasapukon kada' anakna sida papateionna mian. Ka' anak-anak boo mangalawan minti'ina ka' mongorookon minti'ina kada' papateionna mian. <sup>13</sup>I kuu boo komaso'na mian wiwi'na gause mongololo' i yaku'. Kasee ka' i ime a moko taan pasakat ini'imari, ia boo mantausi kasalamatan."

13:9-11: Mat. 10:17-20, Luk. 12:11-12  
13:13: Mat. 10:22

**Yesus nambantikon mangkana'i repaan men marawat tia mian men manganan wakana mesias kasee borek.**

**13:14-23**

(Mat. 24:15-28; Luk. 21:20-24)

<sup>14</sup>"Sa'angu' tempo ai kuu boo mimiile' pingidek men ba'idek tuu' a

wawauna<sup>#</sup> kumekerer na sa'angu' tempat men kosian sida kekere-ionna. (Ime a mambasa ini'i---basa pore-pore se' upa a aratina.) Tempo iya'a mian men damo indo'o na Yudea todaa tumetende' mamarere na buu'na. <sup>15</sup>Mian men damo inda'a mintimale na wawona atopna laigan men malempat, amo' malawu ka' minsoop mangala upa na laiganna. <sup>16</sup>Ka' mian men na ale' sobii ka' mule'kon mangala bokukumna. <sup>17</sup>Silaka' tuu' ka' kolinu' a wiwine men mampaiwawa kabai wiwine men anakkon morio' men dauga' posusuon tempo iya'a. <sup>18</sup>Basambayang kada' amo' tempo memel a kotakaanna tempo iya'a. <sup>19</sup>Gause na tempo iya'a boo taka a sa'angu' repaan men sianpo ia toosuri mian tumbe-tumbepo Alaata'ala nanga-wawau dunia pasakat koini'i. Ka' kosianmo boo taka a repaan men koiya'a soosodo. <sup>20</sup>Kalu Alaata'ala sianta mangampudu'kon tempo ba'idek iya'a, mbaka' giigii' men tuo' sianta sa'angu' a men daa selamat. Kasee ka' Alaata'ala molingu'kon mian men parasaya na ko'ona, mbaka' i ia boo mompopo'ampudu'mo tempo men ba'idek iya'a. <sup>21</sup>Tempo iya'a ka' isian mian manganan na ko'omuu, 'Piile', Mesiasmo a kani'i' kabai tacna, 'Piile', Mesiasmo a kale'e' Alia' mamarasaya upa men ia tundun mian kanono'. <sup>22</sup>Gause biai' a mesias borek tia nabii borek boo taka. Raaya'a boo mangawawau upa men kosamba' ka' mangawawau upa men kosian biasa wawauonna mian, kada' todaa a mian men parasayamo na Alaata'ala mama-

rasaya upa men wawauonna i'raaya'a. <sup>23</sup>Mbali' iya'a taengku, 'Pore-pore i kuu.' Gause daa yaku' bantilkonmo a upa men boo rumpakion ini'imari."

13:14: Dan. 9:27, 11:31, 12:11

13:15-16: Luk. 17:31 13:19: Dan. 12:1, Why. 7:14

**Yesus nambantilkon kotakaanna  
Anak Manusia.  
13:24-32**

(Mat. 24:29-36; Luk. 21:25-33)

<sup>24</sup>"Kasee noko daa repaan iya'a, ilio boo pintung ka' wulan sianmo tarang. <sup>25</sup>Bitu'on bo mandawo' indara'amari na langit ka' giigii isiina langit, koimo planit, bitu'on, ilio, ka' wulan, boo korimbur ba'ide-idek.

<sup>26</sup>Na tempo iya'a mian uga' boo mimiile' i yaku', Anak Manusia, taka indara'amari na lalomna antong tia kuasa balaki' ka' lingkangan. <sup>27</sup>Ka' na tempo iya'a uga' ai yaku' boo momosuu' umuar malaa'ikatku kada' bo pingirimpung giigii' mian rurukingku na papaat botakna dunia, na puusna dunia taka na puusna langit.

<sup>28</sup>Inau' a popiala na kau ara. Ka' panga' morio' molusa'mo pure'an ka' umuarmo a lonsongna men morio', mbaka' inti'ionmuumo se' boomo tempona mapanas. <sup>29</sup>Koiya'a i kuu ka' mimiile' upa men nosida, kada' bo inti'ionmuu tempo iya'a sianmo maalin. <sup>30</sup>Rongor pore-pore: koo'po mian men tuo' tempo koini'i pate, wiwi'na upa men yaku' bantilkon i kuu boo sidamo. <sup>31</sup>Langit tia dunia boo penta', kasee

wurungku tataap pasakat sidutu.

<sup>32</sup>Mau koiya'amo, sianta sa'angu' mian a minginti'i se' ipimo a tempona. Mau malaa'ikat na surugaa sianta minginti'i. Yaku'po men anakna Alaata'ala sianta minginti'i. Tongko' Tamangku na surugaa a minginti'i."

13:24: Yes. 13:10, Yeh. 32:7, Yl. 2:10, 31, 3:15, Why. 6:12

13:25: Yes. 34:14, Yl. 2:10, Why. 6:13

13:26: Dan. 7:13, Why. 1:7

13:32: Mat. 24:36

**Yesus mambantili kada' batoropot  
pasakat na kotakaanna soosodo.**

**13:33-37**

(Mat. 24:37-44)

<sup>33</sup>"Amo' rame, kasee tio ba'ingat pore-pore. Gause i kuu sianta ninginti'i kotakaanna tempona. <sup>34</sup>Kotakaanku soosodo popialakonon koi sa'angu' mian men mamarerei laiganna mamarasayakon na ana-anakna bo pinginti'i laigan iya'a. Ka' ana-anak sanda' nitarai men boo dagaion. Ka' uga' i ia nomosuu' pandagai soopan balaki' mandagai pore-pore kada' mempeperai boo kotakaanna. <sup>35</sup>Mbali' iya'a i kuu badaga, gause i kuu sianta ninginti'i se' ipi i yaku' taka, too guntumalom, kabai tanga'na rondon, kabai karani' ilio kabai se' too mau'ulolop tuu'. <sup>36</sup>Kada' damo ola-olan taka i yaku', amo' takaionku i kuu pintanga' royot. <sup>37</sup>Upa men yaku' bantilkonmo i kuu, bantilkononku uga' na mian wiwi'na se' ba'ingat pore-pore."

13:34: Luk. 12:36-38

### Sagia bo mampapatei i Yesus

14:1-2

(Mat. 26:1-5; Luk. 22:1-2; Yoh. 11:45-53)

**14** Dauga' koi rua' ilio muntumbeimo Pangaramekon-nan Paska<sup>#</sup> tia Pangaramekon-an Roti Men Sianta Ragina. Imam moola' na agama Yahudi tia wawa ukum Torat, kaekae' mansarak salan bo mangarakop i Yesus wuni-wuni ka' mampapatei. <sup>2</sup>Taena i raaya'a, "Amo'po wawauon na ramean dako' gora' a mian biai'."

14:1: Kel. 12:1-27

### Yesus nitimbu'i minamina'

narwastu

14:3-9

(Mat. 26:6-13; Yoh. 12:1-8)

<sup>3</sup>Sarataa ai Yesus na Betania, na laigan ni Simon men kustaon mbaripi, taka a wiwine sa'angu' nanga-wawa botor men watu pualam, buke' a minamina' narwastu. Minamina' narwastu iya'a alayo' tuu' a angga'na gause sianta baurna. Kaekae' kumaan i Yesus, ia pula'imo wiwine iya'a a talopna botorna, kasi nitim-



*Toropii kaliangan pakakas men niwawau na watu pualam*

bu'ikon na takala' ni Yesus a minamina' narwastu iya'a. <sup>4</sup>Toropii a mian indo'o nomaso'mo, ka' nopootundunii simbaya'na, taena i raaya'a, "Upa a kana'na minamina' narwastu kale'e ka' lalaision? <sup>5</sup>Gause minamina' narwastu kale'e sida balukonon labi tolu' atu doi' dinar, ka' ilina sida obo-oboskonon bona mian talalais." Liuliu ia komaso'i i raaya'a a wiwine iya'a.

<sup>6</sup>Kasee taena i Yesus, "Patalai i ia. Kadai i kuu se' mompoposusa i ia? Ia nangawawaumo upa men pore ka' men tontunde' bona ko'-ongku'. <sup>7</sup>Ka' mian talalais sinampang damo raani'i tii kuu. Sanda' ilio kalu i kuu mingkira', sidaonmuu tulungon i raaya'a. Kasee ai yaku', sianta sina-sinampang tii kuu. <sup>8</sup>Ia nangawawaumo upa men daa sidaonna wawauon. Wakangku ia poko minamina'imo bookoi pontoropotianna bo pantanoman i yaku'. <sup>9</sup>Parasayamo! Longko-longkop tano', aana-aana a Lele Pore na Tumpu tolelekonon, mau ino'o uga' wawauna wiwine kani'i bantilkonon bookoi pinginau'an i ia."

14:3: Luk. 7:37-38 14:7: Ul. 15:11

### Yudas boo mambalukkon i Yesus

14:10-11

(Mat. 26:14-16; Luk. 22:3-6)

<sup>10</sup>Na lalomna sompulo' rua' murit ni Yesus isian sa'angu' mian men ngaanna ai Yudas Iskariot. Ai ia nomae' nari imam moola' bo mongorookon i Yesus na ko'ona i raaya'a. <sup>11</sup>Wiwi'na i raaya'a nobeles



tuu' nongorongor bantilan ni Yudas, ka' ia toon i raaya'a i Yudas bo taraion doi'. Noko daa iya'a, ai Yudas nansarakmo salan men daa pore bo pongorookonanna i Yesus.

**Yesus mangkaan kakaan  
Pangaramekonan Paska tia  
muritna  
14:12-21**

(Mat. 26:17-25; Luk. 22:7-14, 21-23;  
Yoh. 13:21-30)

<sup>12</sup>Na ilio tumbena Pangaramekonan Roti men Sianta Ragina, mian malia' mongkoyo' domba Paska. Tempo iya'a murit ni Yesus nobapikirawar na ko'ona, taena, "Mbaana po'uusmuu bo pontoropotianmai kakaan bo Pangaramekonan Paska?"

<sup>13</sup>Kasi i ia nomosuu' rua' mian muritna, potoona, taena, "Rae' na kota; nda'a na kota i kuu boo pootuung sa'angu' moro'one tumambu' nangawawa gumbang buke' a weer. Lolo' i ia. <sup>14</sup>Na laigan men pinsoopanna, bantilikon na tombono laigan iya'a, inta', 'Potuun ni Gurumai, mbaana a tambin men bo kumaananku tia muritku men bo pangkaanan kakaan Pangaramekonan Paska?' <sup>15</sup>Mianmo inono' a men bo pinsiso'kon na ko'omuu sa'angu' tempat na parawawo. Tempat iya'a nipoko toropotimo wiwi'na tia pakakas men bo pakeon. Toropotimo wiwi'na a upa bo pakeonta."

<sup>16</sup>Kasi rurua' mian men murit ni Yesus nomae' na kota. Ia piile' i raaya'a wiwi'na tuutuu' a men koi taena i Yesus. Mbaka' i raaya'a notaropmo bo kaanon na Pangaramekonan Paska.

<sup>17</sup>Malomna taka i Yesus tia muritna sompulo' rua' na laigan men nitoropotimo. <sup>18</sup>Kaekae' i raa-ya'a poto'oruang kumaan, ai Yesus norobu, taena, "Porongor, tuutuu'na sa'angu' mian na lalomna sompulo' rua' kuu, men kaekae' kumaan tii yaku' bo mambalukkon i yaku'."

<sup>19</sup>Tongko' nongorongor iya'a, mbaka' nasiongo'mo a noana i raaya'a ka' sanda-sanda' i raaya'a norobu na ko'ona, taena i raaya'a, "Too daa taasi'po i yaku' inooro'o?"

<sup>20</sup>Taena i Yesus, "Mian iya'a sa'angu' mian na lalomna i kuu sompulo' rua' ka' men mongorom roti singka-singkat sa'angu' lean tii yaku'.

<sup>21</sup>Memang Anakna Manusia boo pate koi men nipoko tulismo na lalomna Wurungna Alaata'ala. Kasece silaka' tuu' a mian men mongorookon Anakna Manusia. Mian men koiya'a, mbulo sobii i ia ka' nidodongokon."

14:18: Mzm. 41:9

**Perjamuan ni Tumpu Yesus  
14:22-26**

(Mat. 26:26-30; Luk. 22:15-20;  
IKor. 11:23-25)

<sup>22</sup>Kaekae'mo kumaan i Yesus tia muritna ia ala i Yesus a roti ka' nobaselele' na Alaata'ala. Ia rumpi-rumpik i Yesus a roti, kasi ia rookon i raaya'a taena, "Labot ka' kaan, ni'imo a wakangku."

<sup>23</sup>Noko daa koiya'a, ia ala a inuman tia anggur ka' nobaselele' na Alaata'ala, kasi ia rookon i raaya'a wiwi' irana ninginum na inuman iya'a. <sup>24</sup>Ia nobatundunmo, taena, "Ni'imo a rara'ku men bo ton-

tumpas bona mian biai' tempona i yaku' papateion. Rara'ku tontumpas mompotuutuu' toonna Alaata'ala. <sup>25</sup>Bantilkononku i kuu, yaku' sianmo minginum soosodo anggur koi kani'i pataka na iliona men bo pinginumankumo anggur iya'a men u'uru tii kuu na Batomundo'anna Alaata'ala.

<sup>26</sup>Noko daa nangananikon nanian pujian, raaya'a nomae'mo na Buu'na Zaitun.

14:24: Kel. 24:8, Yer. 31:31-34

### Petrus boo minsasapu ni Yesus 14:27-31

(Mat. 26:31-35; Luk. 22:31-34;  
Yoh. 13:36-38)

<sup>27</sup>Yesus nobatundun na ko'ona i raaya'a, taena, "Kuu wiwi' kuuna boo sian mantaan a noamuu. Gause nipoko tulismo na Alkitaap, 'Boo papateionku a gembala ka' giigii' domba boo bagera-gerap.' <sup>28</sup>Kasee kotuo'ankumo soosodo, yaku' a bo mongolukoni i kuu na Galilea."

<sup>29</sup>Ai Petrus ninsimbati i Yesus, taena, "Mau i raaya'a wiwi'na sian mantaan a noana, see men i yaku' moko taan."

<sup>30</sup>Tae ni Yesus, "Bantilkononku i koo koini'i, rondommo kani'i, sianpo tia paraa muntuturuu' a siok kopinduanna, koo noko porotolumo minsasapu na ingku'."

<sup>31</sup>Kasee i Petrus nanggagai, taena, "Yaku' mau pate sama-sama tii koo, sian minsasapu na ko'oom." Ka' wiwi' irana uga' nobatundun koiya'a.

14:27: Za. 13:7 14:28: Mat. 28:16

### Yesus na Getsemani 14:32-42

(Mat. 26:36-46; Luk. 22:39-46)

<sup>32</sup>Taka i Yesus tia muritna na tempat men ngaanon Getsemani, tae ni Yesus na muritna, "Oruang ka'ita i kuu; yaku' dauga'na mae' barado'a."

<sup>33</sup>Ka' i Yesus nangange i Petrus, Yakobus, ka' i Yohanes mae' tii ia. Ia nunsuri nasiongo' ka' siasa. <sup>34</sup>Tae ni Yesus na ko'ona i raaya'a, "Noangku masiongo' tuu' koi se' kolapuskumo surion. Ka'itamo i kuu ka' ba'ingat pore-pore." <sup>35</sup>Ai Yesus nobalimba'mo ndeendee'e, kasi notumutumba' na tano' ka' nobarado'a. Na do'ana, ia mama'-ase' too daa sida kada' i ia amo' munsuri kasansara'an men boo tumaka.

<sup>36</sup>Tae ni Yesus, "Tamangku, oo Tamangku, sianta upa men koo' sida men taemuu. Lakasi a kasansara'an kani'i na wakangku. Mau koiya'amo, taasi' pingkira'ku a lolo'on, kasee pingkira'muu a lolo'on."

<sup>37</sup>Noko daa iya'a, i Yesus no'umule'konmo. Ia takai a muritna royot. Ia nimbisaramo i Simon Petrus, taena, "Simon, se' royot i kuu? Tongko' sa'angu' jaam se' sianta momoko i kuu ba'ingat?"

<sup>38</sup>Kasi i Yesus nobatundun na ko'ona i raaya'a, taena, "Ba'ingat pore-pore ka' barado'a dako' takaionna parasoba'an. Noamuu mo'uus mongololo'ikon upa men kana', kasee wakamuu sianta moko taan."

<sup>39</sup>Kasi i ia nomae' soosodo ka' nobarado'a men koi ia tundun na do'ana umba'a. <sup>40</sup>Noko daa iya'a, ia no'umule'konmo soosodo na

muritna. Ia takai noroyotmo soosodo i raaya'a, gause i raaya'a mototundo' tuu'. Sianmo ia inti'i i raaya'a se' koi'upa a bo pinsimbati i Yesus.

<sup>41</sup>Ai Yesus nomae'mo barado'a ka' no'umtule'kon soosodo koporotoluna na ko'ona i raaya'a. Tae ni Yesus, "Kadai se' dauga' royot i kuu ka' mintimale? Daamo. Takamo a tempona. Piile'. Yaku' Anakna Manusia rookononmo na limana mian baradosa. <sup>42</sup>Wangon, mai kita mae'mo. Ai ia men bo mongorookon i yaku' takamo."

#### Yesus nirakop 14:43-52

(Mat. 26:47-56; Luk. 22:47-53; Yoh. 18:3-12)

<sup>43</sup>Pintanga' i Yesus morobu, notakamo i Yudas men sa'angu' muritna men na lalomna sompulo'rua' ira iya'a tia mian samberos nopoowawa toyumu' tia amangkul. Mian i raaya'a ia posuu' imam moola' ka' wawa ukum Torat, tia motu-motu'ana Yahudi. <sup>44</sup>Ai Yudas nongorookon i Yesus noko daa nambantikonmo pongoosan koi kani'imari na ko'ona i raaya'a, taena, "Mian men tabe'ion ka' ookionku, ya'amo i Yesus. Rakop ka' wawa i ia. Dagai pore-pore dako' mamarere."

<sup>45</sup>Tongko' notaka i Yudas imba'a, ia liuliu nuntuu'i i Yesus ka' nobisara, taena, "Guru," kasi nongooki i Yesus. <sup>46</sup>Mbaka' ia intonimo i raaya'a i Yesus ka' nirakop. <sup>47</sup>Isian sa'angu' mian men indo'o tii Yesus numbubut toyumu'na ka' nontotok sa'angu' ata'na Imani Moola' Tuu', tamban noko-

pahtas a tilingana. <sup>48</sup>Yesus nobisara na ko'ona i raaya'a, taena, "Saruionmuu i yaku' se' too parampok mbali' se' i kuu taka potowawa toyumu' tia amangkul bo mangarakop i yaku'?" <sup>49</sup>Taasi' sanda' ilio i yaku' damo nda'a mimisiso' i kuu na tolodona Laiganna Alaata'ala, see i kuu sianta nangarakop i yaku'?" Kasee tiodaa koiya'a a kosidana kada' kana' a men nitulis na Wurungna Alaata'ala."

<sup>50</sup>Noko daa iya'a, wiwi'na murit ni Yesus notumetende'mo namarerei i Yesus.

<sup>51</sup>Sa'angu' laandue' moro'one, na malom iya'a tongko' nokalimbut toik lenang, mae' nongololo' i Yesus. Ia intoni i raaya'a a mian iya'a bo rakoponna, <sup>52</sup>kasee liuliu ia tikarkon a kalimbutna ka' notumetende' ladaladak.

14:49: Luk. 19:47, 21:37

#### Yesus na aropna Ukum Agama 14:53-65

(Mat. 26:57-68; Luk. 22:54-55, 63-71;  
Yoh. 18:13-14, 19-24)

<sup>53</sup>Tongko' daa koiya'a, ai Yesus niwawamo na Imam Moola' Tuu'. Wiwi'na imam moola' ka' motu-motu'a tia wawa ukum Torat nobarimpung indo'o. <sup>54</sup>Ka' i Petrus nuntuntuni i Yesus olo-oloa, taka na tolodona Imam Moola' Tuu'. Inda'a i ia no'umoruang nintingola' na tanga'na ari pandaga ka' ninguru. <sup>55</sup>Imam moola' tamban tia wiwi'na Ukum Agama mansarak kasakisiian ni Yesus kada' daa i ia tiodaa ukumon bi pate, kasee i raaya'a sianta nantausi sa'angu'ipo kasala'an. <sup>56</sup>Biai' uga' a mian mompootundun

kasakisiian men kosianta tuu' men mangkana'i i Yesus, kasee kasakisiiana i raaya'a kosian pootutu'.

<sup>57</sup>Kasi isian toropii mian sakisii nokumekerer ka' nompootundun upa men kosianta tuu', men mangkana'i i Yesus, taena i raaya'a, <sup>58</sup>"Kai nongorongormo mian kaya'a nobatundun, taena, 'Yaku' bo munguruntun Laiganna Alaata'ala men ia wawau manusia, kasee na lalomna tolu' ilio pokereronkumo a laigan sanggiran, men taasi' wawauna manusia." <sup>59</sup>Ya'apo kasakisiiana i raaya'a kosian pootutu'.

<sup>60</sup>Imam Moola' Tuu' nokumekerermo na tanga-tanga'na mian biai' ka' nimikirawari i Yesus, taena, "Kadai i koo se' kosian minsimbati? Koi'upa men ia raitkon mian karaaya'a na ko'oom?"

<sup>61</sup>Kasee i Yesus tongko' rokorokot, sian ninsimbati. Imam Balaki' Tuu' dauga' nimikirawari i Yesus soosodo, taena, "Koomo a Mesias, Anakna Tumpu Tontunde', kabai taasi'?"

<sup>62</sup>Tae ni Yesus, "Yaku'mo mba'a inono'. Ka' i kuu boo mimiile' i yaku', Anakna Manusia, umoruang paraas na uananna# Alaata'ala Men Bisa Tuu'. Kuu uga' boo mimiile' i yaku' taka na Alaata'ala na tanga-tanga'na antong nda'amari langit."

<sup>63</sup>Nongorongor wurung ni Yesus, Imam Moola' Tuu' nomaso'mo ka' nemberak bokukumna suungna.# Ia nobisara, taena, "Bo upa ka' mansarak sakisii soosodo? <sup>64</sup>Kuu ka' daa nongorongormo i ia

ningidek ngaanna Alaata'ala. Koi'upa i kuu?" Kasi i raaya'a nompoposa'angu' wurungna i raaya'a, men ai Yesus tiodaa ukumon bi pate.

<sup>65</sup>Kasi toropii mian ninginori i Yesus ka' nongompodi ro'upna ka' numukul i Yesus, kasi nobisara na ko'ona, taena i raaya'a, "Io nabii, soba ngaan too i ime a numukul i koo." Tamban ari pandaga mase numuku-mukul i ia.

14:58: Yoh. 2:19 14:62: Dan. 7:13

14:64: Im. 24:16

### Petrus ninsasapu ni Yesus 14:66-72

(Mat. 26:69-75; Luk. 22:56-62;  
Yoh. 18:15-18, 25-27)

<sup>66</sup>Tempona iya'a, i Petrus dauga'na indo'o na tolo. Ka' notaka indo'o a sa'angu' wiwine, ata'na Imam Moola' Tuu'. <sup>67</sup>Ia toopiile' se' isian i Petrus ninguru, ka' ia pakalolo'i a dudusna, taena, "Ai koomo uga' a men poopoololo' tii Yesus, samba Nasaret iya'a."

<sup>68</sup>Kasee i ia ninsasapu, taena, "Sianta inti'ionku ka' sianta arationku se' upa a paraluuwum." Ia ala i Petrus rae' na soopan balaki' na gandaria. [Nuntuturuu'mo a siok.]

<sup>69</sup>Ia toopiile' wiwine iya'a i Petrus soosodo, ia uga' nobisaramo soosodo na mian iraando'o, taena, "Mianmo kani'i mba'a a sambasambana i raaya'a." <sup>70</sup>Kasee i Petrus dauga' ninsasapu soosodo.

Kodi-kodi' mian men damo

14:62 umoruang paraas na uananna: Piile' uga' 12:36.

14:63 nemberak bokukumna suungna: Na adatna mian Yahudi, kalu Imam Moola' mongorongor mian mingidek ngaanna Alaata'ala i ia tiodaa nemberak bokukumna.

iraando'o nimbisaraimo i Pétrus soosodo, taena i raaya'a, "Sianta pokosianaan, koomo mba'a men sa'angu' samba-sambana i raaya'a, gause i koo mbaka' lipu' Galilea."

<sup>71</sup>Nobatadeanmo i Petrus ka' nobasumpa', taena, "Yaku' mbase sianta inti'ionku inooro'o mian men kuu ngaan."

<sup>72</sup>Singka-singkat iya'a, nuntuturuu'mo a siok men kopinduanna. Liuliu notonginai' i Petrus, se' ia poko bantikonmo i Yesus, taena, "Sianpo muntuturuu' a siok men kopinduanna, ai koo noko porotolumo minsasapu na ingku." Liuliu nowiri i Petrus, tambaamo bolingogoton.

### Yesus na aropna i Pilatus

15:1-15

(Mat. 27:1-2, 11-26; Luk. 23:1-5, 13-25;  
Yoh. 18:28-19:16)

**15** Ma'ulo'-ulop tuu', ari imam moola' tia motu-motu'a ka' ari wawa ukum Torat, tia wiwi'na Mahkama Agama nomosa'angu'mo wurung. Ia koot i raaya'a i Yesus, kasi niwawa ka' ia soorkon i raaya'a nai Gubernur Pilatus. <sup>2</sup>Pilatus nimikirawari i Yesus, taena, "Koomo akon a Tomundo'na lipu' Yahudi?" Ia simbati i Yesus, taena, "Koi nooro'omo men koi taemuu."

<sup>3</sup>Liuliu imam moola' nunguarkon wurung ba'idek, biai' kaliangan, mangarait i Yesus. <sup>4</sup>Kasi ia pikirawari i Pilatus i Yesus soosodo, taena, "Kadai i koo se' sian minsimbati? Rongor, biai'mo kaliangan a wurungna i raaya'a mangarait i koo."

<sup>5</sup>Kasee i Yesus sianta tia santaa'

a wurungna ninsimbati. Mbaka' i Pilatus nosamba'mo.

<sup>6</sup>Nosidamo kabiasa'an sanda' taun na rameanna Pangaramekonon Paska, ai Pilatus munguarkon sa'angu' mian men na ukuman men koi pa'ase'na mian biai'. <sup>7</sup>Na tempona iya'a isian mian ngaanon i Barabas tia mian toropii men sian momorongori pamarenta nitarungku singka-singkat. Gause i raaya'a nampapateimo mian na tempona palawananna i raaya'a. <sup>8</sup>Mbaka' notakamo a mian biai' ni Pilatus ka' nama'ase' kada' kabiasa'an iya'a men munguarkon sa'angu' mian na tarungkuan uga' lolo'ikonon koini'i. <sup>9</sup>Ia pikirawar i Pilatus, taena, "Ko'uusmuu a Tomundo'na lipu' Yahudi kani'i uarkononku?" <sup>10</sup>Ia inti'imo i Pilatus se' imam moola' mongorookonmo i Yesus, gause masindir.

<sup>11</sup>Kasee imam moola' nungusukimo ka' mamakisaa kada' mian biai' mama'ase' ai Barabas a men bo poki uarkononna i raaya'a. <sup>12</sup>Dauga ia pikirawari i Pilatus soosodo, taena, "Ansee ka' koiya'a upaionkumo a mian kaya'a men taemuu se' Tomundo'na lipu' Yahudi?"

<sup>13</sup>Liuliu nangkakaro' i raaya'a, taena, "Saliipkonmo a mian kanono'."

<sup>14</sup>Kasee taena i Pilatus na ko'ona i raaya'a, "Se' upa a idek men ia wawau?" Kasee i raaya'a tongko' kaekae' ka' boolak mangkakaro'kon, taena i raaya'a, "Saliipkon a mian kanono'."

<sup>15</sup>Gause i Pilatus mingkira' mansanaangi noana mian biai', ia ala uarkon i Barabas men koi kokira'na i raaya'a. Noko daa iya'a, ia

posuu'konmo i Pilatus mian, mansambook i Yesus,\* kasi nisoorkon bo saliipkonon.

### Yesus nibibiani

15:16-20

(Mat. 27:27-31; Yoh. 19:2-3)

<sup>16</sup>Noko daa iya'a, ai Yesus ia wawamo surudadu minsoop na laiganna Gubernuur na tempat pangedilian mian, kasi nileelo' a surudadu wiwi'na barimpung.



*Surudaduna Roma*

<sup>17</sup>Raaya'a nim-bibiani i Yesus ka' namakei duba kakamumu' koi pakeanna mian moola', ka' ni'anamkon lui' ruri'on niwawau koi mahkota, kasi nisulon na takala' ni Yesus. <sup>18</sup>Lapas iya'a, i raaya'a nantabe'imo i Yesus, taena i raaya'a,

"Tabea' oo Tomundo' na lipu' Yahudi." <sup>19</sup>Kasi ia poopool i raaya'a a takala' ni Yesus tia tokon ka ni'ino-inori, kasi notumutumba' topiripii ka' nonsoosa' i Yesus. <sup>20</sup>Noko daa nimbibiani i Yesus, ia ukatimo i raaya'a a dubana men kakamumu', kasi nipopisokikon uga' a bokukumna soosodo. Noko daa iya'a, ai Yesus ni'uarkonmo kada' bo saliipkonon.

### Yesus nisaliipkon

15:21-32

(Mat. 27:32-44; Luk. 23:26-43; Yoh. 19:17-27)

<sup>21</sup>Tempona iya'a, isian sa'angu' mian nolumi, ai Simon a ngaanna, samba Kirene, tama ni Aleksander tii Rupus. Ia baasi sai takana na kota. Liulu ia pakisaa i raaya'a i ia, namasa'an saliip ni Yesus. <sup>22</sup>Yesus ia wawamo i raaya'a na sa'angu' tempat men Golgota a ngaanna, men aratina: Buu'na lamasna takala'. <sup>23</sup>Kasi ia pitarai i raaya'a i Yesus tia anggur nibaur muur pakuli' pangalalapi polos, kasee ia nobude' ninginum. <sup>24</sup>Noko daa iya'a, ia saliipkonmo i raaya'a i Yesus. Kasi ni'obo-obos a pakeanna, ka' ni'ondekon bo pantantukonan too i ime a men mangala.

<sup>25</sup>Nansaliipkonan i ia, na jaam 9 ma'ulop. <sup>26</sup>Bookoi sababna se' nongko'upa i ia se' ni'ukum, daa piile'on na tulisan men nipakampa' inda'a na saliipna, men nitulis: "Tomundo'na lipu' Yahudi." <sup>27</sup>Nansaliipkonan i

15:15 mansambook i Yesus: Sambook na lipu' Yahudi niwawau na anitna ayop ka' nitariki tia besi kabai wuku men masasom na pupu-pupus. Sambook kani' malia' pakeonna i raaya'a pansambok mian pataka pate.

Yesus singkat tia nansaliipkonan parampok rurua'. Sa'angu' mian na paraas uananna, ka' sa'angu' mian na paraas kauri'na. [<sup>28</sup>Ka' koiya'a, sampamo tuu' a men nitulis na lalomna Wurungna Alaata'ala, taena, "Ia uga' tonsoop saa'na mian ba'idek."]

<sup>29</sup>Mian men lumiu inda'a mombosikon ka' mingideki i ia ka' mingilokon takala'na i raaya'a mimbibiani i Yesus, taena i raaya'a, "Hee, koo men boo munguruntuni Laiganna Alaata'ala ka' men boo mamatindong soosodo na lalomna tolungilio, <sup>30</sup>palau na saliip kanono' ka' salamatkon a wakaam."

<sup>31</sup>Mau imam moola' tia wawa ukum Torat, mombosikon ka' mingideki i Yesus. Raaya'a nopootundunii simbaya'na, taena i raaya'a, "Mian sanggiran pokoonna salamatkonon, kasee wakana suungna sianta pa'alaonna salamatkonon! <sup>32</sup>Kalu i koo tuutuu' Tomundo' Pansalamatkon, Tomundo' na Israel, ansee koini' bi palau na saliip kanono' kada' piile'onmai ka' parasayaon." Mau mian men nisaliipkon singkat i Yesus uga' mangaani i ia.

15:21: Rm. 16:13 15:24: Mzm. 22:18  
15:28: Yes. 53:12 15:29: Mzm. 22:7,  
109:25, Mrk. 14:58, Yoh. 2:19

### Yesus nopate 15:33-41

(Mat. 27:45-46; Luk. 23:44-49; Yoh. 19:28-30)

<sup>33</sup>Na jaam 12 nopitungmo longko-longkop dodongoan iya'a pataka jaam 3. <sup>34</sup>Ka' na jaam 3 nangkakaro'mo i Yesus tia wurung Ibrani, taena, "Eloi, Eloi, lama sabakhtani?" men aratina: Alaata'ala, Alaata'ala, nongko'upa i koo se'

mandalai i yaku?

<sup>35</sup>Nomorongor iya'a, toropii mian men potokerer iraando'o nobatundunmo, taena i raaya'a, "Rongor, ia mengeleelo' i Nabii Elia." <sup>36</sup>Liuliu nomae' a mian sa'angu' nangala garanggan mongura' ka' ia orom na anggur makarang, kasi ia potoor na kau ka' nisoorkon waara'a, nimi'inumi i Yesus. Kasi nobatundun i ia, taena, "Koporeanna, peperaionta ka' piile'on too taka i nabii Elia mantaro' i ia."

<sup>37</sup>Noko daa iya'a, nangkakaro'mo i Yesus, kasi nopate.

<sup>38</sup>Singkat iya'a, toik pongola' na Bait Suci nokoberak rua' inda'ana tudun indo'ona.

<sup>39</sup>Tempona i tanaasna surudadu men nokumekerer na arop ni Yesus, nimiile' lalapusna se' koiya'a (dauga' nangkakaro' bukuan), mbaka' nobatundunmo i ia taena, "Tuutuu' a mian kani'i se' Anakna Alaata'ala!"

<sup>40</sup>Isian uga' toropii wiwine men nokumekerer olo'-oloa. Raaya'a ai Maria Makdalena, Salome, ka' i Maria sina ni Yoses tii Yakobus men itiu'. <sup>41</sup>Wiwi' irana nongololo'mo i Yesus ka' mingimamat tia muntulung tempona i ia na Galilea. Ka' isian biai' a wiwine sanggiran iraando'o men noko takamo na Yerusalem tii Yesus.

15:34: Mzm. 22:1 15:36: Mzm. 69:21  
15:38: Kel. 26:31-33 15:40-41: Luk. 8:2-3

### Yesus nitanom 15:42-47

(Mat. 27:57-61; Luk. 23:50-56; Yoh. 19:38-42)

<sup>42</sup>Maamaalom, koo'po muntumbai ilio Sabat, wiwi'na tiodaa toropotionmo bo mangaropi ilio

Sabat. <sup>43</sup>Koo'po sopok a ilio iya'a, ai Yusup samba Arimatea, sa'angu' mianna Ukum Agama men tongaan, men uga' memeperai Batomundo'-anna Alaata'ala, nambaranikon wakana ka' nomae' ni Pilatus ka' nama'ase' biibii ni Yesus. <sup>44</sup>I Pilatus nosamba' nongorongor se' i Yesus nopatemo. Mbaka' ia nengeleelo'mo tanaasna surudadu ka' nimikirawar na ko'ona too nolapusmo i Yesus. <sup>45</sup>Noko daa ia nongorongor bantilan na tanaasna surudadu se' koiya'a, ia rookonmo i Pilatus a biibii ni Yesus na i Yusup.

<sup>46</sup>Kasi i Yusup ningili toik lenang, noko daa, ia taro'konmo a biibii ni Yesus men nisaliip ka' nambalun tia toik lenang koi kabiasa'anna i raaya'a, kasi nomotokol biibii ni Yesus na lalomna kubur men nipa'-atikon na watu na buu'na. Noko daa iya'a, ia tinda'mo a watu balaki' men bo pantalopi soopanna kubur iya'a. <sup>47</sup>Maria Makdalena tii Maria sina ni Yoses nimiile' i Yesus nipotokol na kubur iya'a.

Yesus notuo' soosodo  
16:1-8

(Mat. 28:1-8; Luk. 24:1-12; Yoh. 20:1-10)

**16** Daa noporusmo a ilio Sabat, ai Maria Makdalena, Salome, ka' i Maria sina ni Yakobus, ningilimo pakuli' bo pintimbu'i biibii ni Yesus na lalomna kubur. <sup>2</sup>Na Minggu, ilio tumbena minggu iya'a, ma'ulo'-ulop daa bete'mo a ilio, i raaya'a nomae'mo mbaatu'u na kubur. <sup>3</sup>Nopootunduniimo i raaya'a simbaya'na, taena, "Ai ime inta' a bo pingilinda'kon i kita watu men na soopanna kubur?" <sup>4</sup>Kasee kara-

ni'mo i raaya'a, ia piile' a watu men balaki' iya'a noko tolinda'mo. <sup>5</sup>Liuliu ninsoop i raaya'a na kubur. Olan ia piile' i raaya'a se' isian sa'angu' mian laandue' namake pakean bubulak oru-oruang na paraas uananna. Ka' notongkodi' tuu' i raaya'a.

<sup>6</sup>Kasee mian men laandue' iya'a liuliu norobu na ko'ona i raaya'a, taena, "Alia matakut! Kuu mansarak i Yesus samba Nasaret men nisaliipkon iya'a. Ia mbaka' notuo'mo soosodo. Ia sianmo kani'i. Piile'! Kani'imo a tempat men nomotokolanna i raaya'a i ia. <sup>7</sup>Kasee koini'i, rae' i kuu, bantilkon giigii' muritna ka' na ko'ona i Petrus, inta', 'Ai Yesus nongolukonimo i kuu na Galilea. Ntu'uasi ka' piile'onmuu i ia, koi men ia poko bantilkonmo i kuu mbaripi.'"

<sup>8</sup>Liuliu no'umuar i raaya'a ka' notumetende' namarerei kubur iya'a, gause i raaya'a notongkodi' ka' natakut tuu'. Raaya'a sianta non-tootundun upa-upa na mian sa'a-sa'angu'ipo, supu-supuanna na takut. 16:7: Mat. 26:32, Mrk. 14:28

Yesus nintipiile'kon wakana ni  
Maria Makdalena  
16:9-11

(Mat. 28:9-10; Yoh. 20:11-18)

[<sup>9</sup>Daa notuo'mo soosodo i Yesus, na Minggu ma'ulo'-ulop, na ilio tumbena na minggu iya'a, tumbena tuu', ia nintipiile'kon wakana ni Maria Makdalena, men mbaripi ia buse'i i Yesus a meena pipitu' men nangalampingi i ia. <sup>10</sup>Kasi i Maria Makdalena nomae' nambantilkon na mian men sinam-



pang mongololo' i Yesus, men tempona iya'a dauga' na lalomna masiongo' ka' wiri. <sup>11</sup>Ia rongor i raaya'a se' i Yesus notumuo'mo soosodo ka' ia piile' i Maria Makdalena, kasee i raaya'a dauga' sian mamarasaya.

**Yesus nintipiile'kon wakana na muritna rurua'**

**16:12-13**

(Luk. 24:13-35)

<sup>12</sup>Noko daa koiya'a, isian mian murit ni Yesus rua' ira no'umuar namarerei kota. Yesus nintipiile' na ko'ona i raaya'a see poosasala' tia nintipiile'na ni Maria Makdalena i ita. <sup>13</sup>Raaya'a no'umule'konmo ka' nambantikon samba-sambana sanggiran, kasee samba-sambana dauga' sianta mamarasaya.

**Yesus nintipiile'kon wakana na sompulo' sa'angu' muritna**

**16:14-18**

(Mat. 28:16-20; Luk. 24:36-49; Yoh. 20:19-23; Kis. 1:6-8)

<sup>14</sup>Komburi'na ia nintipiile'konmo wakana na muritna men sompulo' sa'angu' ira iya'a, na tempona i raaya'a kaekae' kumaan. Ya'asi kasi ia sasala' i Yesus a men kosian laan boo mamarasaya tuu', ka' men baroan a noana, see dauga'na mune' sian mamarasaya mian men noko pimiile'mo i Yesus men notuo'mo

soosodo. <sup>15</sup>Kasi i Yesus nobisara na ko'ona i raaya'a, taena, "Rae' i kuu na longko-longkop tano' ka' tolelekon a Lele Pore bona giigii' manusia. <sup>16</sup>Ime a men mamarasaya ka' saranion, boo salamatkonon. Kasee i ime a men sianta parasaya, boo ukumon. <sup>17</sup>Koi kani'imari a pongoosan men mongololo' mian men parasaya: Ngaanku a pakeonna i raaya'a bo mumbuse'i meena. Raaya'a morobu tia wurung men sianta inti'ionna i raaya'a, <sup>18</sup>ka' mau mingintoni ule, kabai se' minginum rasung, raaya'a sianta nongkonopai. Ka' mian manggeo, kalu epetonna i raaya'a tia limana, sida malesi'."

16:15: Kis. 1:8

**Yesus notoleengket waara'a na surugaa**

**16:19-20**

(Luk. 24:50-53; Kis. 1:9-11)

<sup>19</sup>Noko daa i Yesus norobu koiya'a na ko'ona i raaya'a, notoleengketmo i ia waara'a na surugaa, kasi no'umoruang paraas uananna Alaata'ala ka' mamarenta tia Alaata'ala. <sup>20</sup>Raaya'a men murit ni Yesus nomae'mo nontolelekon Lele Pore na Tumpu na longko-longkop tano', ka' Tumpu uga' muntulungi i raaya'a, ka' mompotuutuu' Lele Pore tia pongoosan men mongololo' i raaya'a.]